



7333

1811

Augustianie



AUG. 7333

Handwritten signature or note, possibly "C. J. ..."

RUDIMENTA HISTORICA,

Sive

Brevis, facilisque Methodus
Juventutem Orthodoxam notitiâ
Historicâ imbuendi,

Pro

Gymnasiis Societatis JESU.
Authore

Ejusdem Societatis Sacerdote.

OPUSCULUM PRIMUM,
Historiæ Biblicæ.



Juxtâ exemplar Vratisl. & Brunsbergense
cum auctuario.

CALISSII,
Typis S. R. M. Coll: Soc: JESU 1744.



LAUDETUR
JESUS
CHRISTUS.

Aug. 1333




P R Æ F A T I O.



Ucubratiunculam hanc,
& quas deinceps typis
vulgabimus, non erudito-
rum, sed tyronum dun-
taxat usui destinamus,
compendiariâ quadam ostensâ viâ, quam
hi sinè pensî scholastici, aliàs perivolven-
di detrimento inoffensio possint pede de-
currere. Hinc methodo uti sumus, jam
olim à Ven. P. Canisio nostro usurpari
solita, utpotè rudium captui in primis
accommodata. Nec pauca consultò hic
omisimus, quæ alii fusè pertractant:
multa etiam cursim ac breviter attigi-
mus, quæ prudens Præceptorum sup-
plebit industria, discantium orexin itâ
excitando, ut nimîâ rerum copiâ nau-
seam nè moveant. Additæ quoque suis
sunt locis historicæ quædam observatio-
nes, ut juvenus jam nunc assuescat non
in nuda duntaxat rerum narratione, ve-

lut cortice, hærere, sed ipsum adeò nu-
cleum, sub ea latentem, vestigare, uti-
lissima rectè & sentiendi & vivendi do-
cumenta indè eruendo. Cæterùm usus
ipse ac experientia docebit brevì, quid
hæc opusculis addendum, quid de-
mendum videatur. Nobis sufficiat me-
thodum prævisse, quâ rudis adhuc ætas
manu quasi ducatur ad historicum illud
stadium propè immensum alacriter in-
grediendum. De Chronologia porrò,
& aliis, in quibus ipsimet Scriptores Ca-
tholici hodiedum inter se discrepant, ni-
hil in medium afferemus, quod Au-
ctorum probatissimorum testi-
monio confirmari
non possit.



Par-



Partitio hujus Opusculi.

P A R S I.

De Patriarchis ante diluvium.

Cap. I. De Creatione mundi, & lapsu Adami.

§. I. Creatio mundi. II. Adami lapsus, & supplicium.

Cap. II. De Adami posteris usque ad diluvium.

§. I. De Abele & Caino. II. De Filiis DEI, & hominum. III. De diluvio.

P A R S II.

De Patriarchis post diluvium, usque ad Abrahamum.

Cap. I. De filiis Noëmi.

Cap. II. De Turri Babylonica.

P A R S III.

De Patriarchis reliquis usque ad Judices Hebraeorum.

Cap. I. De Abrahamo.

§. I. Abrahami res gestæ ante natum Isaacum.

§. II. Ejusdem res gestæ post natum Isaacum.

Cap. II. De Patriarchis Isaac, & Jacob.

§. I. Isaac. II. Jacob.

Cap. III. De Patriarcha Joseph.

§. I. Josephi res gestæ ante venditionem.

§. II. Ejusdem varia fortuna in servitute Ægyptiaca.

§. III. Ejusdem ad summas dignitates promoti præclara facinora.

Cap. IV. De iis, quæ Isrâëlitis à morte Josephi evenêre.

§. I. Isrâëlitarum in Ægypto servitus, & vexatio.

§. II. Liberatio eorundem per Moysen.

P A R S IV.

De Judicibus Isrâëlitarum, eorûmq; regimine.

Cap. I. De 40. annorum profectioe populi Isrâëlitici per desertum Moysæ ductore.

§. I. Dei erga gentem Hebræam beneficia.

§. II. Ejusdem cum alia, tum ingratæ præcipuè animi crimina.

§. III. Supplicia eidem à Deo irrogata.

Cap. II. De Judicibus post obitum Moysæ usque ad Gedeonem.

§. I. Josue. II. Othniel, Aod, Debbora, & Barac.

Cap. III. De 8. Judicibus proximè succedentibus usque ad Samsonem.

§. I. Gedeon. II. Abimelech, Thola, Jair, Jephthæ.

Cap. IV. De 3. postremis Judicibus.

§. I. Samson. II. Heli & Samuel.

P A R S V.

Reges Hebræorum.

Cap. I. De Rege Saule.

§. I.

§. I. Saulis res gestæ, ejusque repudiatio.

§. II. Saulis à Deo reprobati facinora.

Cap. II. De Rege Davide.

§. I. Davidis præclara initia, ejusque lapsus.

§. II. Pœnitentia, & vitæ exitus laudatissimus.

Cap. III. De Rege Salomone.

§. I. Salomon Regum sapientissimus.

§. II. Idemque insipientissimus.

Cap. IV. De Regibus Israëlitarum.

§. I. Novem Reges Israëlitis usque ad extirpationem impiæ stirpis Achab.

§. II. Reliqui decem Reges Israëlitarum usque ad regni illius interitum.

Cap. V. De Regibus Juda.

§. I. Duodecim Reges Juda à Roboam usque ad Ezechiam.

§. II. Octo Reges Juda usque ad captivitatem Babylonicam.

P A R S VI.

De captivitate Babylonica, & quæ post hanc usque ad Hierosolymæ excidium contigere.

Cap. I. De captivitate Babylonica sub Monarchis Assyriis.

Cap. II. De rebus gestis Judæorum sub Monarchis Persicis.

Cap. III. De iisdem sub Monarchis Græcis.

§. I. Judææ status tempore Alexandri.

§. II. Ejusdem varia fortuna sub Regibus Ægyptiis.

§. III. -- sub Monarchis Syriis.

§. IV. -- sub Hebraeis Pontificibus, regium
sibi titulum vendicantibus.

Cap. IV. De Rebus Judaicis sub Monarchis
Romanis.

Appendix de excidio urbis Jerosolymæ.

Isagoge.

Sive

Præviæ quædam quæstiunculæ.

De Historia generatim.

I. Quid est historia?

Est rerum ab orbe condito ad hæc usque
tempora notitia, & commemoratio.

II. Quotuplex est historia.

Est præcipuè duplex, sacra scilicet, sive
Ecclesiastica, & profana.

III. Quid est historia Ecclesiastica?

Est notitia rerum, ad Ecclesiam & Religio-
nem, ejusque tum propagationem, tum in-
fectationem, aliásque hujusmodi vicissitudi-
nes pertinentium.

IV. Quid est historia Politica?

Est rerum in statu ac ordine Politico, belli,
pacisque temporibus, gestarum notitia.

V. Cur in historia studium præcipuè in- cumbendum?

Quia præter singularem animi oblectatio-
nem ad scientias plerásque omnes, imò &
quotidianam vitæ consuetudinem non utilis
modo, sed planè necessaria est.

VI. Quid

*VI. Quid ergo potissimum ex historia
discimus?*

Docemur inde 1. summam DEI sapientiam & providentiam ubique agnoscere, mirari, atque adorare, utpote quæ in hoc mundi theatro tam mirificos rerum eventus identidem nobis spectandos exhibet. 2. Quanto DEUS amore ac beneficiis bonos prosequi, tutarique; quanto verò odio ac suppliciis afficere improbos serius citiusque semper contueverit. 3. Perpetuæ rerum conversiones ac vicissitudines, quas omnes loquuntur historiæ, evidenter demonstrant, quàm fluxa & inania sint terrena hæc omnia, atque adeò quàm parvi, imò nihili facienda. 4. Tam proborum virtutes, quàm vitia pravorum, qui atate nos antecelsere, speculi instar nobis sunt, in quo clarè dilucidèque possimus perspicere, quid agendum nobis, quidve cavendum sit &c.

*VII. Cur historia notitia hoc maximè tempore
est necessaria?*

Cui, hoc præsertim tam erudito ac delicato sæculo, cum viris honoratioribus versanda est, stupiditatis atque inscitiae notam effugere vix poterit, nisi historiarum notitia non mediocri sit imbutus.

*VIII. Quibus adminiculis comparanda hi-
storia notitia?*

Sedula Magistrorum auscultatione, lectione non vaga & confusa, sed certa & destinata, ac iterata eorum, quæ quis legit, auditque, ruminatione.

IX. Quid tyroni & candidato historia præcipuè attendendum?

Ut totius historiæ seriem quandam, ac præcipuas rerum, regnorumque mutationes & temporum periodos cum Chronologia accuratè observet. In subsidium quoque vocanda Geographia; hanc enim & Chronologiam geminos historiæ oculos meritò quis dixerit. Tandem adolescentes jam nunc ex actis præsertim memorabilioribus observationes varias, & documenta ad mores formando idonea colligere, atque alieno periculo sapere discant.

Liber I. Historiæ Biblicæ.

Proœmium.

I. Quibus de rebus præcipuè meminit hæc historia?

De iis potissimum, quæ à mundi primordio ad Christi adventum populo electo evenire.

II. Unde haurienda historia hujus notitia?

Ex veteris Testamenti libris, qui Deo dictante, à Moyse, Josue, Samuele, Esdra, aliisque sacris, Scriptoribus sunt literis consignata.

III. Cur in sacra hac historia primum ac præcipuum ponendum est studium?

Eam ipsam ob causam, quòd instinctu, affla-

statuque Divini Spiritus ad nostram institutionem, utilitatem ac disciplinam sit conscripta.

IV. Sũntne monumenta hæc Biblica ad Ecclesiasticam potius, an Politicam Historiam referenda?

Ad utramque referri possunt; si enim consideremus statum Hebræorum Ecclesiasticum, ad Ecclesiasticam; si Politicum, ad Historiam pertinebunt Politicam.

V. Quenam epocha in hac historia potissimum sunt consideranda?

Sequentes sex.

1. Diluvium annò mundi millesimò sexcentessimò quinquagesimò sextò: (1656.)
2. Vocatio Abraham anno mundi bis millesimò centesimò octavò (2108.)
3. Exitus Israëlitarum ex Aegypto annò M. bis millesimò quingentesimò quadragessimò quartò. (2544.)
4. Regni Hebræorum exordia in Rege Saule, annò M. bis millesimò nonagesimò sexagesimò secundò. (2962.)
5. Captivitas Babylonica annò M. ter millesimò quadringentesimò quadragessimò sextò. (3446.)
6. Christi nativitas annò M. quater millesimò quinquagesimò terciò. (4053.)

VI. Quot partibus constat hæc nostra Historia Biblica?

Sex, quæ ferè cum totidem mundi ætatibus usque ad Christum natum congruunt, suntque sequentes:

I. Aetas

1. *Ætas Patriarcharum* ab Adamo ad diluvium complectebatur annos sex, & quinquaginta supra mille sexcentos. (1656.)
2. *Ætas Patriarcharum* post diluvium usque ad vocationem Abrahamæ numerabat duos & quinquaginta annos ultra quadringentos. (452.)
3. *Ætas reliquorum Patriarcharum* usque ad profectiorem ex Ægypto continebat sex & triginta annos supra quadringentos. (436.)
4. *Ætas Judicum* à Moyse usque ad Reges fuit quadringentorum ac duodeviginti annorum. (418.)
5. *Ætas Regum* à Saule usque ad captivitatem Babyloniam definiebatur annis quadringentis octoginta quatuor. (484.)
6. *Ætas Ducum & Sacerdotum* à captivitate Babylonica usque ad Christum natum sexcentis ac septem annis absolvebatur. (607.)

Universè fluxerunt anni quater mille
quinquaginta tres. (4053.)





P A R S I.
DE
Patriarchis ante Diluvium.

In sequentibus duobus capitibus agetur
1. de creatione mundi, deque lapsu, & pœ-
na Adami. 2. De posteris Adæ ante dilu-
vium.

C A P U T I.
De Creatione mundi, & lapsu
Adami.

§. 1.

Creatio mundi.

I. *Quis mundum hunc condidit?*

DEUS cœlum & terram, & quidquid utri-
usque ambitu continetur, è nihilo produ-
xit sex dierum intervallo, etsi puncto tem-
poris absolvere omnia potuisset. Ac prima
quidem die lucem, alterâ firmamentum con-
didit; tertiâ aquas secrevit à terra, quam her-
bic

bis ac stirpibus conve^{ntum}, omne genus frugum iussit progignere. Die quarta sol & luna cum stellis, quintâ p^{er} p^{er}ces & volucres, sextâ quadrupedia & reptilia omnis generis, ac tandem homo ve^{ut} ^{male} ^{proditus} ^{homo} n^{ost}er cōtin^{uus}, seu rerum omnium aspectabilium breve quoddam, ac mirabile cōpendium est productus.

II. Quomodo DEUS Adamum produxit?

Corpori è terra formato immortalem inspiravit animam, cui divinitatis suæ quasi sigillum, & imaginem ita impressit, ut tres unius animi facultates tres unius Dei hypostases quodammodo exprimerent.

III. Quid Deus die septima à mundi productione perrexit?

A novis dein rebus condendis cessavit, diemque hunc *Sabbathi*, hoc est, *quietis*, sibi sacrum esse voluit, donec Sabbathi loco diem Dominicam, quâ Christus suo ad vitam reditu mundum reparavit, celebrari iudicaret.

§ 2.

Lapsus, & poena Adami.

I. Equisnam locus erat Paradisus?

Hortus erat longè ardenssimus, omnibusque deliciis affluens, Dei ipsius manu confectus. in quo duæ præcipuè arbores eminebant, altera vitæ, altera scientiæ boni & mali appellata. Huc Deus Adamum transtulit, facta potestate omnibus horri fructibus vescendi, unica duntaxat arbore scientiæ excepta, de qua

qua nè quid decerperet, sub mortis pœna ve-
nit, fidei ejus ac obedientiæ periclitandæ
causâ.

II. Ubinam, quove modo Deus Evam
condidit?

In Paradiso Adæ dormienti costam exemit,
atque ex ea Evam formavit, comparem & ad-
jutricem Adamo futuram.

III. Qui verò his tantis beneficiis ambo
respondere?

Pessimè; Eva enim fraude mali genii, ex
serpente loquentis, inducta veritum gusta-
vit pomum, & virum, idem ut faceret, pel-
lexit.

IV. Qua demum ratione veterator ille pomi
prohibiti esum Evæ persuadere potuit?

Assleveraverat mendacissimus scyphanta,
nequaquam ob degustatum fructum morte, uti
Deus minitatus fuisset, eos mulctatum iri,
quin potius plenam, rerum omnium noti-
tiam adepturos, Deoque ipsi fore simillimos.

V. Qua pœna hanc culpam excepit?

1. Ambo innocentiae veste spoliati, mox
suam & viderunt, & erubuerunt nuditatem,
quam proin connexis ficum foliis obte-
ctum ibant. 2. DEUS auditis rejectisque
pütidis eorum excusationibus, suam utrique
denunciavit pœnam, ac Evam quidem libe-
ros suos cum dolore parituram, virique sub
imperio ac potestate futuram; Adamum ve-
rò, postquam vitæ alimenta è terrâ sterili ac

spi-

spinosa multo cum sudore ac labore collegisset, moriturum tandem, ac in eam, unde ortum traxisset, terram reversurum. 3. Ambo Paradiso æternum præscripti; posteritatem omnem in commune secum pertraxere exitium.

C A P U T II.

De posteris Adami usque ad diluvium.

§. I.

De Abele, & Caino.

I. Qui, qualesque hi ambo fuere?

Adami uterque, Cain major, Abel minor natus filius erat: hic pascendis gregibus, ille agris colendis operam dabat: Abel summus erat integritate ac innocentia; Cain contra perversis omnino moribus. Abel optima quæque Deo in sacrificium obtulit; Cain deteriora selegit: hinc Deo acceptissimum erat Abelis sacrificium; Caini verò ^{superfluum} inutile prorsus & ingratum. Id quod tantam in hujus pectore concitavit invidiæ flammam, ut fratrem de medio tollere decreverit; quem proinde amica in speciem invitatione in agros prolectum, crudelissimè trucidavit.

II. Quid perpetrata hac cæde Caino evenit.

Ob immane hoc patricidium à Deo vehementer objurgatus, non tantum poenitentis animi signum non dedit; sed spe omni Divinæ clementiæ abjecta, vagus ac profugus, quo-

quoad vixit, oberrabat, donec tandem à Lamecho ab nepote suo, in sylva pro fera habitus, jaculo est transfixus.

§. 2.

De filiis Dei, & filiis hominum.

I. Quinam erant filii Dei?

Adamo in Abelis locum natus est Sethus, Deo ob virtutis ac pietatis studium apprime charus, cujus posterì erant Patriarchæ illi, qui unà cum filiis, partim ob Sethum, stirpis suæ auctorem pientissimum, partim ob suammet virtutem filii Dei sunt appellati.

II. Quinam ex his præ cæteris memorandi veniunt?

1. Enos Sethi filius, qui primus Deum publicis, solennibusque cæremoniis ac ritibus de venerari cœpit. 2. Enoch, qui ob eximium avitæ religionis studium & summam cum Deo familiaritatem, vivus ex hominum cœtu divinitus est sublatus. 3. Mathusalem, qui vivendi limites, cæteris mortalibus à Deo præstitutos, longè supergressus, annos vixit nongentos sexaginta novem.

III. Quosnam sacer Historicus filios hominum appellat?

Impii Caini progeniem. Cainus hic primam urbem condidit, à filio Henoch Henochiam appellatam. Jubal musicam, ejusque frater Tubalcain ferrariam, seror verò Noëma lanificium invenit. Venatoriam pri-

B

mus

Joannis

mus exercuit Lamech, longè diversus à Lamecho altero, Noëmi parente.

IV. Quis filiis Dei convenire potuit cum filiis hominum?

Sethi nepotes cum feminis, à vitiosa Caini stirpe oriundis, multiplicata inire concubia, è quibus procreati gigantes, scedissima illa scelerum monstra, quorum improbitas usque eò invaluit, ut orbis universus tunc mera esset vitiorum scintilla, non nisi ulticibus diluvii aquis eluenda. Unus Noëmus tot inter malos bonus, & in obsequio Dei constans persistit.

S. 3.

Diluvium.

I. Quenam diluvium antecessere?

Noë, vir justus ac pius, quingentos tunc annos natus, arcam, seu navim prægrandem, trecentos cubitos longam, latam quinquagenos, ac triconos altam, à Deo jubetur construere, in quam se ipse cum suis, ingruente effluvio, tuto possit recipere. Centum ictos annos in ea fabricanda Patriarcha posuit, idcirco ab omnibus passim ludibrio habitus, tanquam delirus senex.

II. Quid confecta demum archa contigit?

Noë, composito undique necessario comitatu & pabulo, ex omni genere animalium, avatilibus exceptis, immundorum quidem omnia, mundorum verò septena in arcam, Dei jussu

jussu & Angelorum subsidio, introduxit, in quam ubi & ipse ^{seu} cum conjuge sua, & tribus filiis Semo, Chamo, & Japheto horumque uxoribus pedem intulit, DEUS ostium foris occlusit.

III. Quid ipso diluvii tempore factum?

Quadraginta dies noctesque continui non tam imbres, quam ^{ex eo} rivi aquarum ruptis cœli cataractis, præcipitârunt, marique insuper omnia, & quidquid aquarum in terræ visceribus latebat, tanto se impetu effundere, ut non orbem tantum universum inundârint, sed & altissimos montium vertices quindecim cubitis supergressâ, quidquid hominum pecorumque terram hanc incoluerat, submerferint, solis iis, quos arcæ DEUS incluse rat, salvis relictis. Anno ab orbe condito sexto & quinquagesimo supra millesimum sexcentisimum. (1656.)

IV. Quam tandem Tragœdia hæc catastrophen habuit?

Centum & quinquaginta diebus elapsis, quibus totus terrarum orbis immensi intar oceani undique restagnâverat, Deus immisso vento calido, ac vehementi, aquas sensim ita imminuit, dispersitque, ut arca post mensem à cœpto diluvio septimum in Armeniæ montibus conquieverit. Indè quarto post mense Noëmus, primò corvum, qui tamen carne, ^{credo} morticina illectus, reversus non est; deinde columbam post dies septem exploratum miserat, quæ, cum non haberet, ubi pe-

dem figeret, arcam mox repetiit, septimâque abhinc die denuò dimissa, virentem oleæ ramum retulit, pacis & cessantis exundationis argumentum. Perstitit nihilominus in arca septem alios dies Noë. Cùmque columba, quam tertium ablegârat, non rediisset, tandem ex arca, ubi per annum deliquit, cum omnibus suis egressus, sacrificium iuncturæ obtrulit, Deo tantopere acceptum, ut promisso sanciverit, se nunquam deinceps mundum simili eluvione castigaturum, ejusque rei perenne signum fore arcum cœlestem. Anno millesimò sexcentesimo quinquagesimò septimò.

Observationes ad primam Historiæ Biblicæ partem.

I. Cur DEUS ab Adamo, mundoque dein universo tam severas expetiit pœnas?

Ut omnes Adæ posterì commonefierent, quàm grande, nec una piandum morte, sit nefas, Deo ipsi esse refractarium, ejusque voluntati atque imperio sese opponere.

II. Nullusne clementiæ Divinæ locus fuit in plectendo Adamo?

Imò longè maximus; nam vel ante denuntiandum supplicium Christum humani generis vindicem ac liberatorem venturum promissit, qui malo huic remedium præsentissimum allaturus esset.

III. Quod-

III. Quotnam, & apud quos erat regimen politicum ante diluvium?

Patriarchæ suam quisque familiam regabant: Caini verò posteri, cum primi urbes frequentate cœperint, rempublicam ordinasse, communibusque temperasse legibus videntur.

P A R S II.

DE

Patriarchis post diluvium.

In sequentibus 2. capitibus recensentur 1. Tres filii Noë. 2. Ædificatio turris Babylonice.

C A P U T I.

Tres filii Noë.

I. Quid de tribus hisce post diluvium memoratu dignum occurrit?

Chamus parenti Noëmo, somno vinoque, cujus vim ignoraverat, ac indece ter denudato, procaciter illudit, erubescens ac derelictantibus fratribus protervians Semo & Japheto, quibus proinde Noë, re intellecta, bene precatus, Chami verò stirpem execratus est.

II. Quibus tunc terminis definiebatur hominum ætas?

Post diluvium nè ullus quidem vitam ultra

annum quingentesimum produxit; cum tamen prius annos amplius nongentos plerisque vixisse constet. Imò Abrahami ætate, annis à diluvio circiter quingentis, vix ullus annum ducentissimum complevit. Virā porro ac viribus hominum horrenda illa eluvione haud parum imminutis, Deus ad imbecillitatis subsidium vinum & carnes indulxit, cum ante hac non nisi oleribus ac leguminibus vesci plerique omnes consueverent.

III. Num tres filii Noë uno semper, eodemque in loco ac regione habitaverunt?

Haudquaquam; nam cum hominum numerus ducentos intra annos à diluvio nimium quantum multiplicaretur, alias sibi sedes querere cogeantur. Japheto Europa cum Asia minore; Semo Asia, quā Orientem spectat: Chamo Africa cum Palæstina, & Phœnicia obtrigit. Prius tamen, quàm omnis multitudo in diversas mundi partes commigraret, ^{et ipse} Vesano prorsus ^{prope} casti turrim ædificare decreverunt, cujus apex cælum usque pertingeret.

CAPUT II.

Turris Babylonica.

I. Quem successum structura hæc habuit?

Initio sat prosperum, donec Deus insanam ædificantium arrogantiam castigaturus, sermonis commercium inopinato prodigio sustulit, lingua, quā tunc omnes eadem utebantur, in plures divisâ. Unde cum alter

alte-

alterius verba haud posset percipere, cœpto erat desistendum.

II. *Quid exinde consilii cepere?*

Deductis in orbem universum coloniis, varias mundi regiones frequentare cœperunt; hinc tanta nationum, linguarum, morumque diversitas.

III. *A quo populus electus originem duxit?*

Ab Alphaxado Semi filio, & avo Heberi, in cujus familia lingua manit Hebræa, à quo & Hebræi nomen ac genus traxere.

IV. *Quis urbem Babylonem condidit?*

Nemodus, Chami nepos, qui homines quâ vi, quâ dolo libertate spoliare, primûsque regios ultrapare titulos cœpit anno M. millesimò octingentesimò septuagesimò nonò (1879.)

Observationes ad II. Historiæ Biblicæ partem.

I. *Quæ altera hac mundi etate rerum facies erat?*

Admodum tristis; nam paucis, qui virtutem colebant, exceptis, plerique in deterius mutabantur, præcipuè cum idolorum cultus introduci cœptus.

II. *Quæ linguae post repentinam illam idioma-
tum permutationem etiamam putantur
esse reliquæ.*

Sequentes: Hebraica, Græca, Latina, Teutonica, Slavonica, & Tartarica, quæ

matrices dicuntur, quòd reliquæ indè sint
ortæ.

P A R S III.

De

Patriarchis reliquis usque
ad Iudices Israëlitarum.

In 4. sequentibus capitibus mentio fit 1. De
Patriarcha Abrahamo. 2. De Isaac, & Jacob.
3. De Josepho Ægyptio. 4. De servitute
Ægyptiaca.

C A P U T I.

De Patriarcha Abraham.

Prior paragraphus Abrahami res ante, po-
sterior post natum Isaacum gestas comple-
ctitur.

§. I.

Abrahami res gestæ ante natum Isaacum,

1. *Qui se habuit Abrahæ à patria sua in alie-
nas terras migratio?*

Cùm DEUS Abrahamum Patrem non mo-
dò credentium omnium, sed Christi quoque
ipñus progenitorem destinasset, eundem pro-
pè septuagenarium è Chaldæa, patria sua,
idolorum cultui dedita, & natali oppido Ur
Haranem primum, Mesopotamiæ urbem,
tum deinde post quinquennem ibidem com-
morationem, in regionem Chanaanitidem,
ipñ,

ipsi, totique ejus posteritati promissam, demigrare jussit, annò ab erbe condito bis millesimò centesimò, decimò quartò. (2114.) Paruit utrobique sinè mora & tergiversatione Abrahamus, ad omnem Dei nutum semper promptissimus.

II. Cur Abrahamus à Lotho sejungi voluit?

Ad id temporis Loth communibus cum Abrahamo patruo suo tectis & pascuis utebatur. At cum vir sanctus novas identidem rixas suos inter ac Lothi pastores existere animadvertisset, pacis studio seorsum deinceps habitare statuit. Lothus facta sibi ab Abrahamo optione, quemcunque voluisset, terræ tractum occupandi, regionem longè amenissimam, Sodomæ circumjacentem, sinè ulteriore disquisitione elegit, ignarus, quanta indè sibi pericula, malæque imminerent. Annò M. bis millesimò centesimò decimò sextò. (2116.)

III. Quo pacto Abrahamus Lothum, ab hoste captum, in libertatem affruit?

Rex Sodomæ à 4. Regibus bello lacesitus, unà cum aliis 4. Regibus, quos in subsidium advocarat, vincitur, captæque urbe Sodomæ, Lothus quoque cum suis in servitutem abstrahitur. Quò compertò, Abrahamus cum trecentis ac duodeviginti è sua familia exercitum victorem strenuè insecutus, fundit, fugatque; atque ità non Lothum modò in libertatem restituit, sed omnem Sodomis ablatam prædam recuperat. Anno M. 2118.

*IV. Quid de Abrahamo & 3. Angelis sacra
Littera referunt?*

Cùm Abrahamus sub meridiem fervente solis æstu ad ostium tabernaculi consideret, tres Juvenes (Angeli erant peregrinorum habitu) adventare conspicit; mōxque obviam progressus, perofficiosè salutatur, & prandium sub opacæ arboris umbra apparari jubet. Remotis mensis, peregrinorum unus Abrahamo significat, Saram uxorem, utt̃ ætate jam provectam, filium enixuram. Ob rei hujus novitatem atque insolentiam clanculum subrisit Sara, reprehensa idcirco ab Angelo, quasi Dei potentix diffidisset. In discessu unus è cœlestibus genis Abrahamo aperit, urbem Sodomam ob nefanda flagitia propediem eversum iri. Ille & nepotis, & civium vicem miseratus, iteratis instat precibus, urbi ut parcat, si deni saltem infantes in ea numerarentur; verùm nè tot quidem repertis, ultrà intercedere ausus non est. 2139.

V. Quas pœnas urbs Sodomæ dedit?

Non hæc tantùm, sed & aliæ tres urbes (nam quintæ Segor nomine, Lotho deprecante, pepercit flamma) ruente de cœlo imbre igneo ac sulphureo, in cineres sunt redactæ. Ex horribili hoc incendio solus Loth, ejusque uxor ac filix dux ab Angelis propè per vim sunt ereptæ, addito severo mandato, retro nè respicerent, quod quia Lothi uxor, curiositate victa, pensum non habuit, in statuam salis est conversa. 2139.

§. 2.

Res Abrahami gestæ post natum Isaacum.

I. *Quid de Ismaële memorandum venit?*

Hunc Abrahamus ex Agare ancilla suscepit; verum cum insolentius sese efferre, ipsumque adeò Isaacum insectari ausus esset, urgente Sara, nec cælo improbante, unâ cum Agare matre sua paternis ædibus expulsi sunt. Fugientes sitis propè confeceret, nisi Angelus, monstrata fontis scaturigine, jussisset Agarem filii curam gerere, utpotè qui peramplicæ familiæ parens olim futurus esset. 2144.

II. *Quale sacrificium DEUS Abrahamo imperavit?*

Ut filium suum longè charissimum immolaret in monte Moria, quò vir sanctus sinè cunctatione profectus, tridui itinere appulit. Hic primum Isaacus, qui suis ipse humeris ligna portabat, intelligit, paterna sibi manu moriendum. Nec abnuir, ad omnem Dei, patrisque nutum expeditissimus filius. Jamque aræ impositum ferro appetebat parens, cum cœlesti voce manum cohibere, & filii locò arietem, quem, Deo haud dubiè providente, vepræis implicitum, videt, cedere jubetur, similiue certior fit, tam promptum Deo obsequendi studium eximiis cœli favoribus, Christiue ipsius è stirpe sua ortu remuneratum iri. 2163.

III. *Ubi*

III. Ubi & quando Sara mortem appetiit?

Anno ætatis centesimò vigesimò septimò Hebrone diem suum magno filii & mariti luctu obiit, sepultaque est in spelunca duplici, quam Abrahamus ab Ephrone Hetheo numeratâ pecuniâ emit. 2175.

C A P U T II.

De duobus Patriarchis Isaac, & Jacob.

Prior Paragraphus de Isaaco, posterior de Jacobo ager.

§. I.

Isaac.

I. Quando, & quamnam Isaacus uxorem duxit?

Triennio à Saræ matris obitu, cùm Isaacus annum ageret quadragesimum, Abrahamus parens Eliezerem, qui rem omnem domesticam summa fide atque integritate administrabat, in Mesopotamiam, patriam suam ablegat, sponsam ut indè adducat filio. Is longum ingressus iter tandem haud procul ab urbe Haran ad puteum quendam constitit, ubi cœlesti, ut erat vir pius, implorato auxilio, eam Isaaco sponsam divinitus destinatam esse intelligit, quæ sibi, suisque camelis potum ultro præbitura esset. Præbuit Rebecca Bathuelis, Abrahami ex fratre nepotis, filia, cui proinde pretiosa, quæ secum ferebat, donaria confestim obtulit. Domo, mensaque exceptus, renuit prius cibum capere, quam demandatæ sibi legationis munere plenè per-

fun-

functus esset. Re ex omnium voto confecta, Eliezer Rebeccam, formâ non minùs quàm virtute conspicuam, in Palæstinam deducit, anno ante obitum Abrahami trigesimò quintò, post orbem conditum, bis millesimò, centesimò, septuagesimò nonò. (2179.)

II. Quos Isaac filios genuit?

Vigesimò demum anno ab inito matrimonio Rebecca Esauum, & Jacobum enixa est, gemellos quidem, quippe eodem partu editos, sed habitu corporis animique longè dissimillimos; nam Esau major natu præter morem aliorum infantium corpore erat hirsuto; Jacob glabro: ille agresti ferocique ingenio; hic placido, & tractabili indole.

III. Quo pacto Esauus primogenitus jus suum fratri cessit?

Cùm fortè à venatione redux ingenti fame cruciaretur Esau, lenticulæ, quâ tum frater vescebatur, tanto tenebatur desiderio, ut non dubitârit natalem prærogativam Jacobo pulcullâ vendere. Cujus dein cessionis, etiam jurejurando firmatæ, eum postea serò nimis pœnituit. (2218.)

IV. Uter alteri benedictionem paternam præripuit?

Jacobus natu minor, idque non tam astutius Rebeckæ matris suæ, quàm arcano Dei consilio. Statuerat Isaacus decrepita jam ætate senex Esauo, tanquam primogenito, & familiæ Principi, bene precari; prius tamen hunc venatum ire, atque ex ferina prædagram

^{matrem} ^{uxte}
 tum palato suo epulum apparare jubet. Quo
 cognito Rebecca quoque Jacobo in manda-
 tis dat, ad gregem illico properet, duosque
 indè hædulos pinguissimos afferat. Hos illa
 ferinæ in morem exquisitè coxit, condiit-
 que, atque è pelliculis collare & manicas
 fingens, Jacobo tam scitè aptavit, ut Isaac,
 cui præ senio caligaverant oculi, ex hirsutis
 manibus & collo Esauum coram adesse con-
 jectans, licèt de voce addubitaret, Jacobo
 faustas inter preces primogeniti jura
 & privilegia impertierit.

V. Quò animò hanc stropham Esauus tulit?

Iniquissimò; hinc præ ira & indignatione
 fremere, lamentari, ejulare, tantòque in
 fratrem odio ferri cœpit, ut eum de medio
 tollere decreverit.

§. 2.

Jacob.

I. Quam viam Jacobus iniit impotenti fratris iræ
 se subducendi?

Ex matris consilio, & cum bona patris ve-
 nia in Mesopotamiam ad Labanum avuncu-
 lum suum confugit.

II. Quid in hoc ei itinere accidit?

Cùm nocte præventus sub diis pernoctare
 cogeretur, dormienti objecta est scala mysti-
 ca à terra ad cœlam usque perringens, per
 quam cœlestes genii sursum deorsum com-
 meabant: quin DEUS ipse supremo in gradu
 consistens, quæ olim Abrahamo promiserat,
 con-

confirmare denuò, ac rata habere voluit.
2276.

III. Quomodo Jacobus ab arunculo est exceptus?

Ad urbem Haran appropinquantì Rachel occurrit, patris sui greges pascens, quæ ut primum in consobrini sui notitiam venit, patrem de re tota certiore fecit. Ille nepotem suum inter amplexus & oscula domum suam latus deducit. Mense ferme exacto Jacob, ut Rachelis nuptiis potiretur, septennem operam in pascendis gregibus Labano locavit; qui tamen promissis haud stetit, sed emenso septem annorum spatio, Liam filiam natu majorem substituit, minorem ea demum lege nuptui daturus, si septem alios annos in famulatu futurum se reciperet. Nec conditionem hanc, ut arduam, respuit Jacob, amore, quo in Rachelem ferebatur, amarissima quæque edulcante.

IV. Quando, quove cum comitatu domum remigravit Jacob?

Postquam pro Rachele & Lia quatuordecim, sexque insuper annos pro gregibus redimendis strenuam Labano locarat operam, in patriam tandem reverti statuit: cumque de discedendi potestate à socero impetranda desperaret, consulto prius numine, reque cum uxoribus communicata, clam iter ingreditur, socero ad tendendas oves alio sum tunc profecto; qui tamen cognitâ generi fugâ, nimium quantum exandescens, cum valida suorum manu fugientem celerrimè est in-

seque-

secutus, pessimè haud dubiè excepturus, nisi DEUS vetuisset graviùs quidquam in illum consulere. Igitur ultra verba processum non est, quibus Labanus genero suo & furtivam fugam, & sacrilegam idolorum rapinam vehementer exprobravit. Atque ille quidem de fuga faciliè se purgavit; furti verò, à Rachele commissi, penitus ignarus, mortis reum pronuntiavit, quicumque demum idola surripuisset. Cùm igitur Labanus universam generi suppellectilem frustra excussisset, Rachele idola subter stramenta abdente, post longam tandem altercationem fœdus utrinque sancitur. Redit exinde ad suos Labanus, Jacobus iter cœptum prosequitur.

V. Quomodo fratrem reducem excepit Esau?

Statuerat homo efferus vitam eidem eripere, tametsi hic, missis etiam legatis ac muneribus, adventum suum humanissimè amicissimèque nuntiari jusserit. Quadringentos Esau armaverat viros, quo nuntio conternatus Jacob, suppetias à cœlo supplex petit, atque ut iram fratris placaret, nova destinavit munera, agmènque in tres turmas divisit. Indè precibus de nocte intentum cœlestis genius virili specie ad luctam provocat. Nec certamen detrectat Jacob, ad diluculum usque, læso licèt ac enervato femore strenuè colliuctans cum personato palestrita, quem non antè dimisit, quàm sibi bene precatus fuerat. Exinde Jacobus appellatione
sanè

sanè gloriosa, *Isràël*, seu *pravalens Deo*, cognominari cœpit, simulque divinitus est edoctus, nulli deinceps mortalium succubiturum, postquam superis ipsis invictas probasset vires. Nec multò post *Esau*, armatis stipatus, in conspectum venit; qui tamen singulari fratris modestiâ & comitate ità fuit delinitus, ut immemor omnis vindictæ, *Jacobum* amicissimè sit complexus. 2296.

VI. Quot filios Jacob in Mesopotamia suscepit.

Undecim, cum filia unica, cui *Dinæ* nomen. Filiorum hæc sunt nomina: *Ruben*, *Simeon*, *Levi*, *Judas*, *Issachar*, *Zabulon*, *Dan*, *Nephthali*, *Gad*, *Aser*, *Joseph*, quem ultimum *Rachel* peperit, & aliquot post annis *Benjaminum*, ex cujus partu decessit haud procul ab urbe *Betnlehem*.

C A P U T III.

Josephus Patriarcha.

Hic nota primò variam *Josephi* fortunam, antè servitutem *Ægyptiacam*. 2. Eiusdem servitutem, & captivitatem in *Ægypto*. 3. Honores eidem postea delatos.

§. 1.

Varia Josephi fortuna antè servitutem Ægyptiacam.

I. Cur Josephus in tantam fratrum offensionem incurrit?

Tribus de causis. 1. Quòd præ cæteris tenerius

nerius amaretur à parente, qui togam ei polymitam conficiendam curavit. 2. Quòd fratres suos nefarii cujusdam criminis apud patrem accusarit. 3. Quòd ob narrata quædam somnia dominatum affectare videretur.

II. Quid igitur somniabât?

Putabat, se unâ cum fratribus suis in agro manipulos colligare, ac suum quidem manipulum stetisse erectum, reliquis circumcirca, adorantium ritu, aristas incurvantibus. Aliàs à sole ipso, ac luna, & stellis undecim adorari se in somno sibi videbatur. Quæ cum fide ac mente optima narraret, invidos fratrum animos tantopere exacerbavit, ut in ejus necem conspirârint.

III. Num conceptum animo facinus perpetrare sunt ausi?

Id quidem fixum illis ac statutum erat; sed cruento eorundem consilio intercessit Ruben, natu maximus, qui fratribus auctor fuit, ut Josephum, tam forè parentis jussu ad ipsos invisentem, in proximam cisternam detruderent. Quod eo fecit consilio, ut Josephum clam inde ereptum ad Patrem possit reducere.

IV. Quàm diu Josephus hac in cisterna delituit?

Exiguo admodum tempore; nam cum paulo post negotiatores quidam Ismaëlitarum illac in Ægyptum tenderent, Juda auctore fovea extractus, atque iisdem venundatus, est
vigin-

viginti siclis, annò mundi bis millesimò trecentestimò sextò (2306.) cùm annum ageret decimum septimum.

Qui verò facinus tam atrox parentem celare potuerunt?

Novo scelere commenti sunt, Josephum cruentæ belluæ in prædam cecisse. Missus proinde inauspicati nuntii bajulus, qui fratris tunicam hædino tinctam sanguine exhiberet, ex cujus aspectu miserandus senex luctu propè contabuit.

§. II.

Josephi servitus, & captivitas in Ægypto.

I. Quorsum ab Ismælitis illis mercatoribus abductus est Joseph?

In Ægyptum, ubi venditus est Putiphari, uni è præcipuis Regni Proceribus, quem Josephus mira in rebus agendi dexteritate, fide, ac prudentiâ brevi ità sibi devinxit, ut, homo licèt exterus, ac servituti addictus, rem omnem domesticam administrare juberetur.

II. Num diuturna hac erat ejus prosperitas?

Fuisset, nisi Heræ calumniis appetitus, Heri quoque sui gratiâ repentè excidisset. Nam cùm Putipharis uxori, ad celus iterum, iterumque pellicienti, fortissimè semper resistit, ac demum palliò quoque, quod pro-
cax foemina prehenderat, in impuris manibus relictò, aufugisset, illa, amore in furorem verso, non dubitavit juvenem castissimum at-

tentari flagitii reum agere apud maritum, qui vehementi ira atque æmulatione incensus, illico infontem in carcerem & vincula abripi iussit.

III. Quid hoc in carcere accidit?

Fortè in eundem carcerem Pharaonis jussu compacti sunt duo ministri regii, quorum alter pocillatoribus, alter pistoribus præerat. Illi in somnis objecta erat species vitis, cum triplici palmitè, gemmantis primùm, tum florescentis, ac uvas tandem maturas protrudentis, è quibus liquorem in calicem exprimere, Regique porrigere sibi videbatur. Hic verò per quietem tria vidit canistra, capiti suo imposita, è quorum supremo volucres cibos varios, arte pistoria confici solitos, furripiebant. Indè Josephus conjecit, hunc elapso triduo ad suspendium, illum ad pristinum suum munus evocatum iri; quem proinde rogavit, miseri ac innocentis patrocini-um apud Regem suscipere nè gravaretur. Dicta probavit eventus, nisi quòd pocillatore data fidei oblito, Josepho duos & ampliùs annos hærendum in carcere fuerit.

IV. Qua tandem occasione Josephus è vinculis est exemptus?

Vidit Pharao per somnium septem vaccas præpingues è Nilo emergere, quas aliæ septem strigolæ & macilentæ, indidem exortæ, devoraverant. Ad hæc septem spicæ plenæ, opimæque uno è culmò pullulare videbantur, quas

quas totidem graciles & afflatæ üredine, absumpsêre. Cùm de somniis hisce nemo unus aptam facere conjecturam posset, is, qui Pharaoni à poculis erat, sui jam tandem memor interpretis, Regem monet, esse in carcere juvenem, divinandi apprimè peritum, quem is protinus in aulam acciri jussit.

*V. Quomodo hæc somnia interpretatus est
Joseph?*

Ajebat septem vaccis obesis, uti & spicis plenis septem, totidem annos fertiles portendi, quibus septem alii steriles, à macilentis bobus ac spicis præsignati, successuri essent. Opus proinde fore, ut omne frumentum, annis fertilibus redundans, congeratur in horrea, ingruente annonæ innopia promendum.

§. 3.

Josephus ad amplissimos honorum gradus evectus.

I. Quò præmiò Pharaos Josephum remuneratus est.

Non rei solùm frumentariæ, sed toti eum Ægypto vicaria cum potestate præfecit. Igitur regiis decoratum insignibus currum suum conscendere & triumphali cum pompa circumduci jussit, præcone proclamante, flexo ut omnes poplite Ægypti Proregem, imò & conservatorem mundi venerarentur.

II. Quò suum hoc munus Josephus obiit?

Summa integritate ac sapientiâ, maximò-

que regii ærarii emolumentò. Nam cùm elapsò fertilitatis septenniò, non Ægyptus modò, sed vicinæ quoquè Provinciæ annonæ difficultate laborare cœpissent, omnes ad frumenta emenda certatim in Ægyptum contenderunt, quò & Jacob denos misit filios. Qui ubi supplices stitère se Principi, ab hoc mox agniti sunt, quin tamen fratrem illi suum agnoscerent.

III. Quo verò vultu eos excepit Joseph?

Peregrinum ac ignotum se simulans, vultu ad severitatem composito, exploratores compellabat, in custodiam idcirco tradendos. Illis contrà asseverantibus unius se parentis filios è Chananitide regione adventare, fratre natu minimo domi relicto, hunc ipsum ad rei veritatem comprobendam coràm sibi sisti voluit. Ad postulatum hoc prorsus inexpectatum stabant omnes attoniti, veterisque delicti redeunte memoria, crudelitatem, in fratrem olim exercitam, tantæ modò calamitatis causam esse mutuis lamentis conquerebantur. Ea commemoratio Josepho lacrymas vel invito excussit, quas ut liberiùs funderet, paulisper recessit, moxque reversus, Simeone in vinculis retento, reliquos domum remisit cum tritico & pecunia, quam frumentariis in saccis clam reponi jussit, additò severò mandatò, Benjaminum ad se ut quàmpriù adducerent.

IV. Num Benjaminum à se dimisit Parens?

Diu tergiversanti fames tandem atq; iteratæ filio-

filiorum preces assensum extorsere, Juda pro Beniamini reductione vadem se ultrò offerente.

*V. Nunquid ex sententia successit altera
hæc profectio?*

Rectà in Principis palatium deductis lautum apparatur convivium; cùmque dein Prorex ipse comparuisset, prono in terram vultu eum devenerabantur, quos ille perbenignè accipiens, multa de parente sciscitabatur. Sed nihil æquè Josephi animum commovit, ac Beniamini fratris sui uterini aspectus; unde prorumpentibus denuò lachrymīs vultum avertere, & in secretiūs sese abdere cubiculum cōgebatur. Paulò post mensæ accumbitur, ac reliquum diei tempus hilarè, juncundèque traducitur. Cùm abitum die postero pararent, saccos frumentò impleri, pecuniàmque ut nuper reponi jussit, scyphò argenteò in Beniamini saccum insertò.

*VI. Quæ illis molestiæ ob ipsum hunc scyphum
exhaustiendæ erant?*

Iter jam ingressos œconomus Proregis jussu præproperè insequitur, poculum, veluti furtò ablatum, repetiturus. Nemo tanti sibi facinoris conscius erat. Verùm dum sarcinæ excutiuntur, ecce tibi! in Beniamini sacco repertus est scyphus incredibili omnium luctu & consternatione. Igitur Beniaminus in urbem captivus abstrahitur, quem ceteri quoque omnes sunt secuti, delicti fraterni veniam deprecaturi. Præ reliquis Judas voce lamentabili Proregi exponit, quò pacto Beni-

aminum certò reducturum spondidisset parenti, haud dubiè morituro præ incerore, si nunc Benjaminò, uti jam olim Josephò, orbandus esset. Hic verò cohibere se ultrà non potuit Joseph. Igitur Ægyptiis abscedere iussis, in has voces, largo perstans fletu, erumpit: Ego sum Joseph frater vester, quem Ægyptiis vendidistis. Nihil à me metuendum vobis. Singulos dein, suavissimè complexus, ubi rei novitate perterritos videt, prorsusque attonitos, indè eos potissimùm consolatur, quòd hæc omnia evenissent sapientissimò DEI consiliò, in Ægyptum se præmittentis, ut eorum, multorùmque salutem consuleret. Irent igitur sinè mora, & cuncta nunciarent parenti, huncque cum suis omnibus in Ægyptum deducerent.

VII. Quis accepto hoc nuntio animus fuit Jacobo?

Profundo velut è somno excitatus senex adduci vix potuit, ut crederet; at ubi currus, jumenta, cæteraque itineris subsidia coràm inspexit, totus cœpit reviviscere, moxque cum suis ad longum & laboriosum iter lætus & alacer se accinxit, ut Josephi, quem pridem extinctum putabat, aspectu desideratissimo frui liceret. Annò mundi bis millesimò trecentessimò vigesimò nonò. (2329.)

VIII. Quæ Jacobi in Ægypto fuit fortuna?

Non solum à Josepho mutuos inter amplexus, & manantes præ gaudio lachrymas, sed à Rege ipso honorificentissimè est exceptus, qui

usque ad Iudices Israëlitarum. 7. 41

qui Regionem Gessenam, frugum feracissimam, pecorique pascendo aptissimam, habitandam concessit, ubi Jacobus annos decem & septem commoratus, annò ætatis quadragesimò septimò supra centesimum è vita migravit, fausta precatone filiis priùs omnibus impetrata. Præcipuè verò Josephum est obtestatus, suum ut cadaver in Regione Chananide avito monumento inferendum curaret: id quod præstitum maximo cum apparatu & magnificentia, annò mundi bis millesimò trecentesimò quadragesimò quintò (2345.) Josephus porrò supremos inter aulæ honores vitam ad plures perduxit annos, donec annò administrationis Ægyptiacæ octogesimò, vitæ centesimò decimò diem suum obiit, fratribus ossa & cineres, uti vivens petierat, post annos ampliùs trecentos, patrio tumulo inventibus. Erant Josepho duo filii, Ephraim, & Manasses, quos Jacobus avus perinde ac reliquos suos filios promissæ illius terræ hæredes instituit.

CAPUT IV.

Servitus Ægyptiaca.

Hic recensenda primò Hebræorum vexatio regnante Pharaone alio. 2. Moysis ad eundem legatio.

§. I.

Hebræorum afflictio.

I. Quâ fortunâ à morte Josephi usi sunt

Hebrai?

C 5

Oppi

Oppidò adversâ; nam mortuo Rege illo, gentis Hebrææ peritudioſo, Pharaos alius Ægypto imperavit, Isràélitis longè infensissimus, quos suprà quàm dici potest, cœpit affligere, veritus, nè gente hac extera propè immensum excreſcente, sibi tandem suisque securis esse non liceret: unde stirpem hanc sibi longè invisissimam radicitus parabat excindere annò M. bis millesimò, quadringentesimò quinquagesimò primò. (2451.)

II. Quibus id artibus perficere tentavit?

Principio Hebræos duris cœpit laboribus exercere; verùm cùm indè vegetiores multò fœcundioresque fieri animadvertisset, mares omnes, simul ac editi in lucem essent, ab obstetricibus Ægyptiis necari jussit. His verò tam crudeli imperio minimè obtemperantibus, novò sanxit edictò, ut infantes masculi omnes, recens nati, aquis suffocarentur.

III. Quì igitur Moyses parvulus evasit?

Mater, cui Jochabed nomen, tribus hunc mensibus domi suæ clàm educaverat; verita dein, nè res patefieret, fiscellæ scirpæ, bitumine oblitæ, impositum, Nilo committit.

IV. Num aquis haustus est infans?

Divinò factum consiliò, ut eo ipso tempore Pharaonis filia ad Nili ripam deambulans, fiscellam, calici adharèntem, ad se deferri jussit; quâ apertâ, cùm bellissima specie pusionem vagientem invenisset, conductâ nutrice, eadem illâ, quæ pepererat, sollicitè educandum, indèque in aulam translatum

Ægyptiis excolendum literis curavit. Annò M. bis millesimò, quadringentesimò sexagesimò quartò. (2464.)

§. 2.

Moylis ad Regem Pharaonem legatio.

I. *Quàm diu Moyses in aula regia est commoratus?*

Ad annum usque ætatis suæ, quadragesimum, mundi bis millesimum, quingentesimum tertium (2503.) quo ex Ægypto in regionem Madianitidem profugus, Jethroni soceri suo in pascendis ovibus quadragenariam locavit operam.

II. *Quomodo inde evocatus fuit ad populum Israëliticum ab Ægyptiorum servitute vindicandum?*

Ad Horebi montis radices gregem fortè pascenti, DEUS in rubo flagrante quidem, nec tamen de flagrante, spectandum se obtulit, jussitque Pharaonem adire, & suo ei nomine populi Hebræi missionem imperare. Ad quod munus ritè obeundum DEUS virtutem ei potestatemque extraordinariam, ac fratrem iusuper Aaronem comitem & adiutorem addidit. Annò M. bis millesimò, quingentesimò, quadragesimò tertio. (2543.)

III. *Quem ex hac sua legatione fructum tulit?*

Nullum penitus; quin potius versa & mutata in pejorem partem sunt omnia. Nam Pharao vehementiore inde irâ accensus Irlælitas novis obrui laboribus, ac verberibus mulctari jussit.

IV. *Qui*

*IV. Quibus porro machinis obstinatum Regis
animum expugnare sunt adorti?*

Decem intentârunt plagas, alias aliis gra-
viores, quibus tamen obfirmatum tyranni pe-
ctus magis semper magisque obduruit, per-
calluitque. *Revelatio*

V. Quenam fuerant hæ plagæ?

Principiô Nilus, & aquæ Egypti omnes,
in sanguinem mutatæ, computruere, pisci-
bûs pariter extinctis. 2. Incredibilis rana-
rum copia in mensas, lances, pateras, lectos
&c. involans longè omnia latèque fœdabat.
His succedebant 3. immensa cyniphum, seu
culicûm pungentium examina. 4. Muscarum
multò molestissimarum numerus sinè numero.
5. Contagiosa pecorum lues. 6. Venenatæ
pustulæ, & turgentia hominum ulcera. 7.
Grando horribilis, stragem, & vastitatem
inauditam afferens. 8. Locustarum multi-
tudo innumerabilis, absumens penitus, quid-
quid grando reliquum fecerat. 9. Tenebræ
triduanæ tam spissæ, ut manibus quasi contre-
ctari possent. Hæ tamen plagæ omnes fer-
reum Pharaonis animum adeò non emolli-
runt, ut indurârint magis.

*VI. Quodnam Moyſes mandatum ante pla-
gam decimam accepit à DEO?*

Ut Israëlita per suas quisque familias agni-
casi sanguine postem utrumque cum super-
liminari conspergerent, sicque ædes suas ab
Egyptiorum domibus distinctas plaga immi-
nente eximerent.

VII. Qua-

VII. *Quanam decima, eaque postrema
fuit plaga?*

Sub mediam noctem Angeli, facto à Regii filii cæde exordio, primogenitos omnes cum hominum, tum jumentorum contrucidârunt.

VIII. *Num victas tandem manus dedit
Pharao?*

Moyſen & Aaronem vehementer ipſe urgebat, imò & rogabat, nullâ ut interpoſitâ morâ cum ſuis omnibus abitum maturarent, nè fortè graviora ſibi ſubeunda forent ſupplia. Igitur Iſrâélitæ ad ſexcenta virorum milia, non annumerata imbelli mulierum ac parvulorum, vulgîque promiſcui turba, ex Ægypto, ubi annis ducentis & quindecim diverſati ſunt, demigrârunt, pretioſis ditati ſpoliis, vâſis videlicet aureis & argenteis, variâque ſuppelleſtili, quam ad ſolemne Sacrificium DEO offerendum mutuati ſunt ab Ægyptiis. Annô M. bis milleſimô quingentefimô quadreſimô quartô. (2544.)

IX. *Nihilne turbarum concitavit Pharao poſt
Hebræorum diſceſſum?*

Cùm tertio poſt die, quàm abierant, comperiſſet, Iſrâélitas nîl minùs, quàm reditum meditari, ſuæ illum indulgentiæ pœnitere cœpit. Quocirca ingenti cum exercitu fugientes perſecutus, paulóque poſt aſſecutus, victoriam ſpe devoraverat, cùm Hebræi hinc mari Erythræo, indè hoſtibus cingerentur. At ſpes eum ſua fruſtrata eſt; nam ut primùm

Moyſ-

Moyſes mirificâ ſuâ virgâ mare percuffit, continuo aquis gemini inſtar muri utrinque ſuſpenſis, multitudini univerſæ ſiccum aperuit tramitem, quò tutò tranſire omnes poſſent. Tentabat id ipſum Pharaò cum ſuis; verùm longiùs progreſſos mare, coeuntibus denuò fluctibus, ità obruit, ut è tanto exercitu nè cladis quidem nuntius ſupereſſet. 2544.

Observationes ad tertiam Partem Hiftoriæ Biblicæ.

I. *Quid in rebus geſtis Patriarcharum præcipua conſideratione dignum occurrit?*

Mirus DEI amor, cura, & providentia; quâ ſuos, ac Joſephum præcipuè Ægyptium tot inter discrimina, casûſque varios paterna fanè ſollicitudine fovere, ac protegere conſuevit.

II. *Cur Abrahamus credentium Pater nuncupatur?*

Ob fidem, quam divinis ſemper pollicitationibus præſtitit integram, promptamque, tametſi magnæ non rarò difficultates ſeſe offerrent.

III. *Quæ porrò vis inerat paterna illi benedictioni, quam à fratre ſibi præreptam tantopere doluit Eſau?*

Præter alias prærogativas, divina inſuper illa promiſſa de venturo olim Meſſia tranſſerebantur in filium, qui hòc pactò in album pro-

progenitorum Christi quodammodo referebatur, è sacrorum Interpretum sententia.

IV. Cur DEUS Hebræos in Ægypto tot premi calamitatibus est passus?

Cùm ad horum fidem periclitandam; tum ad eorundem animos per adversa tenaciùs sibi agglutinandos; tum etiam ad imminentes olim Ecclesiæ suæ afflictiones præsignandas, è quibus tamen eam, perindè atque antehac Isrâëlitas, mirabiliter esset erepturus.

V. Quis tertia illa mundi ætate, cùm sacra, tum profana reipublica, status erat & conditio.

Profana per alia atque alia regna, in Græcia præsertim recèns fundata, magnum cepit incrementum. Imperium Assyrium, Ægyptium, Chinense, Scythicum, aliâque, prioribus jam sæculis stabilita, in suo perstabant vigore. Sacra porrò Respublica è paucis admodùm membris constabat; Patriarchis videlicet, eorùmque familia, cæteris terrarum incolis, si Isrâëlitas, aliòsque perpaucos exceperis, teterrima idololatriæ caligine involutis.



P A R S IV. De Judicibus Isràëlitarum.

In quor sequentibus capitibus consideranda imò. Hebræorum per desertas solitudines quadraginta annorum profectio, Moyse ductore. 2. Eorundem in Palæstinam, Josue præeunte, deductio. 3. Res gestæ Gedeonis, aliorumque Judicum, qui proximè succelsere. 4. Facta Samsonis, Heli, & Samuelis.

C A P U T I.

Isràëlitarum per loca deserta profectio.

Hic expendenda primò divina erga populum Isràëliticum beneficia. 2. Ejusdem cum alia, tum ingrati præcipuè animi crimina. 3. pœnæ idcirco inflictæ,

§. I.

DEI erga populum Isràëliticum Beneficia.

I. Quem DEUS Isràëlitis, per invias solitudines iter facientibus, viæ ducem adjunxit?

Interdum nubes perlucida; noctu verò columna ignea agmen præcedendo viam quasi monstrabat: cumque castra metanda, subistere, cum progrediendum, prægredi solebat, diurnos arcens calores, & nocturnas pellens tenebras.

II. Quis

II. Quis tantæ multitudini de necessario comæatu, cibo, potu, vestibus prospexit?

Hæc DEUS multiplici miraculo suppeditavit; nam primò quadraginta ipsos annos Manna, mirifici saporis ac nutrimenti de Cælo subministravit, quod ante solis exortum quotidie colligendum, nec in diem posterum servandum erat, præterquam pridie Sabbathi, quò portione duplici in duos seponebatur dies. 2. Aqua deficiente, Moyſes ex ipsis rupibus prodigiôsæ suæ virgæ percussu fontem elicuit, copiosis ac perennibus rivis scaturientem. 3. Vestimenta, toto illo profectio- nis tempore, usu ac vetustate consumpta non sunt. Nec quisquam morbo tunc tentatus est; unde nec medicamentis erat opus.

III. Quomodo DEUS Hebræos contra hostiles incursus defendit?

Amalecitæ transitum iis armata manu tentabant præcludere. Igitur Moyſes Josue cum expedita manu ad subendam pugnæ aleam præmittit; ipse verò cum Aarone fratre, & Hure sororis suæ ma-
 in montem, unde pugnantes conspici possent, conscendit, ibique divinum imploraturus auxilium, in genua supplex procumbit, mirabili prorsus eventu ac vicissitudine; nam Moyſe manus in cælum levante, vincunt Isrâëlitæ, succumbente verò præ lassitudine, succumbunt & ipsi. Quo animadverso, Har & Aaron lassata Moyſis brachia usque eò sustentârunt, dum fufis, fuga-

fugatisque hostibus, Israëlitaë gloriosam victoriam sunt adepti. Annô M. bis millesimô quingentesimô quadragesimô quartô. (2544.)

IV. Quis favor singularis Israëlitis ad montem Sinai obvenit?

Statuerat DEUS Israëlitas præcipuo quodam studio, ac inito etiam cum iisdem fœdere, in populum peculiarem sibi adsciscere ac cooptare; quapropter Sinæo in monte geminas Decalogi tabulas, cœlesti scriptas manu, Moyse tradidit, ac additis pollicitationibus peramplis, si suum & ipsi obsequium, fidemque præstarent. Quadraginta ipsos dies noctesque in monte Moyse familiari cum DEO consuetudine utebatur, unde è vultu ejus tantus emicabat splendor, ut nemo in eum oculos posset defigere, nec nisi obducta velo facie, cum aliis ei deinceps agendum fuerit.

V. Quid Moyse in diuturno illo suo secessu erat negotii?

Cùm DEUS peculiari quodam ritu ab Israëlitis coli, atque hos inter sedem sibi ac domicilium collocare decrevisset, Moysem singularim docuit, quemadmodum divinum Tabernaculum, sive *Sanctuarium* cum sacro apparatu ac suppellectili universa adornandum esset. Tunc Arca fœderis, candelabrum aureum, geminum altare, mensa inaurata, cui duodecim illi panes mystici imponerentur, vestes itèm Pontificiales, aliâque complura descripta & designata fuere. Actum quoque

de inaugurandis Sacerdotibus, statisque eorundem functionibus, ad quas Aaron cum filiis speciatim est delectus; de variis tandem ritibus ac cæremoniis in rerum divinarum usu adhibendis.

§. II.

Gentis Hebrææ cum alia, tum ingrati præcipuè animi crimina.

I. Quando, & quoties commurmurârunt Isrælita?

1. Ad mare Erythræum, ubi cum hinc aliquis, indè hostili exercitu circumseptos se viderent, DEO planè diffisi, protervè, minaciterque cum Moyse expostulare cœperunt, quòd in præsentissimum mortis discrimen omnes adduxisset; an enim sepulchra quæ corpora saltèm tegerent, defuisse in Ægypto? an non satiùs futurum fuisse ibi servitutem, utrum ærumnosam, servire, quàm hic morte longè crudelissima occumbere?

2. Ad locum, cui Mara nomen, ubi Moyse ligni, divinitus monstrati, immissione amaras & aquas, & animos mitigavit.

3. In deserto Sin, ubi panes & ollas Ægyptias tumultuosè exposcentibus, præter incredibilem cõturnicum copiam Manna insuper, cibus longè suavissimus & delicatissimus, è cœlo est datus.

4. In Regione Raphidim, ubi petra virgæ Mosaicæ percussu vim aquarum ingentem effundens, sitim simul ac murmurationem extinxit.

5. Post discessum à monte Sina, ob iter totò triduò continuatum, & contrà Angelum in nube præcedentem, & contrà Moysem ductorem exortum est populi murmur, quod immisso divinitùs incendio sopitum, paulò post vehementiùs recrudit, tumultuosa plebe pisces, pepones, cèpas, & alia Ægypti seditiosè deposcente, hásque horrorem quisquillas Mannæ, pani candidissimo & suavissimo anteferente.

6. Ob insinceram plerorumque speculatorum, quos Moyse ad explorandam Chananitidem miserat, relationem totis castris murmur ingens ac seditio concitata est.

7. Hanc alia haud paulò gravior excepit, quando Core, Dathano, & Abirone terræ hiatu, multisque aliis cœlesti flamma absumptis, tantæ stragis causam omnem in Moysem coniecêre.

8. In deserto Cades, ubi ad compestendum sitientis populi murmur rupes, virgâ Moyse iteratò percussa, aquas largissimas hominibus æquè ac jumentis propinavit.

9. Tandem non in Moysem modò, sed & DEUM ipsum sacrilegis vocibus insurrexêre acerbè conquesti, quòd ex Ægypto in vastam hanc & inhospitam seducti essent solitudinem, ubi nec aquæ, potus, nec panis, nisi Manna, quod cibum vilissimum contemptim vocitabant, suppeteret.

II. *Quid ad montem Sinai deliquêre?*

Dum Moyse in monte quadraginta dies
noctés-

noctésque divino fruitur alloquio , populus ille, tot tantisque DEO nominibus obstrictus, execrando idololatriæ crimine se contaminat, vitulum ex auro conflatum divinis adeò honoribus prosequendo.

S. 3.

Hebræorum supplicia.

I. Quinam primi ac singulatim DEO pœnas dedêre in illa solitudine?

Nadab & Abiu Aaronis filii, qui, cùm ad thus adolendum ignem profanum, contrà ac DEUS præceperat, adhibuissent, cœlesti protinus igne, velut fulmine afflati, illæsis omnino corporibus vestibûsque, interiêre. Duo item lapidibus, DEO &c jubente, sunt obruti, quorum alter lignis colligendis Sabbathum, alter blasphemis vocibus supremum Numen violare est ausus. Præter hos Maria Moysis soror, quòd fratri obrectâisset, scdisimâ infecta est leprâ. Quin & Moyli ipsi ac Aaron terræ illius fortunatæ ingressu est interdictum ea solùm de causa, quòd subdubitârint, an DEUS populo tam ingrato ac rebeli aquas è petra daturus esset.

II. Quæ DEUS supplicia populo irrogavit?

Diu quidem justissimum Numen, Moyse deprecante, vindicem cohibuit manum, sed eò demùm pœna fuit gravior, quò tardior. Ac imò quidem ob idololatriæ crimen, in aurei vituli adoratione commissum, ad tria & viginti millia, à Moyse, & Levitis, Dei hono-

rem strenuè vindicantibus, contrucidati fuisse, aliis non paucis occulta peste sublati.

2. Cùm plurimi iter à monte Sina tribus diebus continuatum, prosequi recusarent, ignis in querulos & ignavos cessatores divinitus emissus, extremam castrorum partem cum iis, qui itineris tædiò ex omni Tribu substituerant assumpsit, majorem longè editurus stragem, nisi hanc Moyses precibus suis avertisset. Locus exinde *Incensio* est appellatus.

3. Vix ultrice hac flamma restincta, multa millia, cùm, Mannæ subeunte fastidio, carnes gulosiùs appeterent, & coturnicibus, ingenti copia divinitus submissis, sese ingurgitarent, ingluviem suam morte luerent; unde loco illi nomen *Sepulchra Concupiscentiæ* inditum.

4. Cùm post duodecim exploratorum è Chananitide reditum factiosus ille populus, desperata terræ divinitus promissæ possessione, in solitudine mori præoptaret, DEUS votum hoc ratum habuit; proindèque rebellibus denuntiari jussit, neminem ex omni belatorum multitudine, qui vigesimum ætatis annum superâisset, pedem in Palæstinam illaturum, sed quadraginta annorum spatiò post longas viarum ambages in desertis Arabiæ occubituros, Josue duntaxat & Calebo; qui meticulosi animos addiderant, exceptis. Reliqui porrò exploratores decem ad aliorum terrorem & exemplum subita morte sunt extincti.

5. Core, Dathan, & Abiron, atrocissima
in

in Moysen & Aaronem conspiratione conflata, cum domesticorum, & conjuratorum turba omnique supellectili vasto terræ hiatu absorbentur, eodémque tempore ducenti quinquaginta facinoris socii, dum thus parant incendere, incenduntur ipsi, flammisque penitus absumuntur. Nec mitius actum cum eorundem fautoribus, tantam suorum cladem Moyfi palàm exprobrare ausis, quorum ferè quindena millia cum tentoriis, cæterisque utensibilibus cœlesti incendio conflagrârunt.

6. Tandem, cùm querelarum & murmurationum nullus esset finis, DEUS pessimam hanc viperarum progeniem serpentibus ignitis castigavit, quorum morsibus longè plurimi perire. Cæteris, qui ducti pœnitentiâ, delicti veniam petebant, præsens remedium attulit serpens æneus, sublimi è pertica conspicuus, cujus vel solo aspectu lethaliter faucii protinus consanuère.

7. Sed nemo Hebræis toto illo peregrinationis tempore gravius nocuit, quàm Balaam hariolus, quem cùm Balacus Moabitarum Rex ad Isrèlitas diris devovendos conduxisset, isque nihilominus & Angeli admonitu, & asinæ, humana voce colloquentis, objurgatione, iisdem vel invitus, DEO scilicet impellente, iterum iterumque benè precatus esset, Balaco, indignissimè id ferenti, post modum auctor fuit, ut per mulieres Moabitidas & Madianitidas eos ad lascivos primum amores, dein ad idoli quoque Beel-

phegor cultum pelliceret. Et verò consilio iniquissimo exoptatus respondit eventus, longè plurimis ad infandos amores & sacra traductis, in quos DEUS tam severè animadvertit, ut exiguum intrà temporis spatium quatuor ac viginti hominum millia vel peste, vel furcâ, vel gladiô sint sublata.

C A P U T II.

De Judicibus post obitum Moyſis usque ad Geddonem.

§. I.

Josue.

I. Quis post Moyſis obitum populo DEI præfuit?

Josue. Hunc Moyſes ipse ex hac vita discessurus, præfecit populo, graviter severèque admonito, DEO ut fidem semper integram inviolatamque præstaret, ejusque mandatis sedulò obtemperaret. Supremo dein montis Nebonis vertice conscenso, postquam populo indè universo benè iterum precatus est, terramque illam, quam, Numine prohibente, pede non potuit, oculis obiit ac perlustravit, summo omnium luctu & comploratione excessit à corpore, quod protinus Angeli tumulto, in hanc usque diem incognito intulère.

II. Qua ratione Josue filius Nûn per Jordannem trajecit?

Memorabili omnino prodigio, nam aquæ, ut-

ut tunc id temporis maximè exundantes, cursum suum omnem usque eò inhibuere, dum populus universus sicco vestigio in adversam ripam evaserit, annò mundi bis millesimò, quingentesimò, octogesimò quartò. (2584.)

III. Quò pacto urbs Jericho capta & expugnata est?

Non armorum vi, sed cœlesti iterum prodigio; nam ubi Josue DEI jussu arcam fœderis, clangentibus buccinis, per dies septem, ac die septimo septies circumferri jussit, murus minutissimi ad solam tubarum sonitum & populi vociferationem sponte sua omni ex parte corruerunt. 2584.

IV. Quid in expeditione, contra Regem Adonisedec suscepta memoratu dignum accidit?

Gabaonitæ Josuen, artificiosò mendaciò circumventum, ad amicitiam secum paciscendam callidè induxerant; quapropter ab Adonisedeco, & alijs quatuor Regibus, tanquam hostes & transfugæ, junctis viribus oppugnati, suppetias à Josue petunt ac impetrant. Hic cum omni suo exercitu ad hostem, qua maxima potuit celeritate, contendens, secundo prælio cum quinque illis Regibus strenuè dimicat; veritus tamen, nè die jamjam in vespèrum inclinante, nox ingruens hostes Hebræorum gladiis eriperet, singulari in DEUM fide ac fiducia fretus, solem tandiu jussit consistere, quoad hostem internecione delisset. Dictum factum. Ad hominis imperium, obstupesciente universa natura, sol subsistens

D 5

diem

diem horis ipsis quatuordecim producit. Occisione hostis occiditur, vincit, ac triumphum agit Israël, 2584. Josue porro Chananitide in reliquas Israëlitis tribus divisa, profecta tandem ætate è vivis excessit.

§. 2.

Othoniel, Aod, Debbora, & Barraccus.

I. *Quis, Josue demortuo, rempublicam administravit?*

Post Josue obitum aliquot annorum interregnum fuit, Optimatibus ac Senioribus ad reipublicæ clavum sedentibus; quo tempore Adonibezec Chananæorum Rex à tribu Juda & Simeonis, ductore Calebo, acie victus, pedibusque ac manibus mutilatus, talionis pœnam solvit, eodem, quò septem antè Reges affecerat, multatus supplicio. Indè Israëlitàe urbes alias vectigales fecère, felices sanè futuri, si in avita semper religione perstitissent, quâ desertâ, deseruntur & ipsi à DEO, & Chusano Mesopotamiæ Regi in captivitatem traduntur, è qua tamen eos, ubi resipuère, victò ac cæso Chusano eripuit Othoniel, è tribu Juda oriundus, qui populum rexit annis 40. usque ad annum mundi bis millesimum sexcentesium quadragesimum.

II. *Quis Othonieli successit?*

Aod, qui Eglone Moabitarum Rege interempto, populum è durissima servitute exemit. Præfuit annos, octoginta usque ad annum

2720. Sub hæc tempora Samgar Hebræus sexcentos è Philistæis, latrocinia & prædas agentibus, non aliis armis, quàm vomere instructus, interfecit.

III. Quis tyranicum Jabinij jugum ab Hebraorum cervicibus depulit?

Debbora, quæ vel imperio, vel certè consilio annis quadraginta cum Baraco populum regebat, & Jahel, virili ambæ animo mulieres. Illa divino afflata Numine (quippe Prophetis erat) Baracum, Hebræi exercitûs ductorem contra Jabinum Chananæorum Regem, qui Isrâëlitas ob restauratum idolorum cultum iusta DEI permissione oppresserat, ad arma concitat insigni de hostibus partâ victoriâ. Hæc Sisaram summum rei militaris apud Jabinum Regem præfectum, ac acie profugum, hospitio excipit, haustuque lactis consopitum, trabali clavo transfigit, sicque bello simul ac servituti finem imponit.

C A P U T III.

De Gedeone, ejusque successoribus usque ad Samsonem.

§. I.

Gedeon.

I. Qua ratione Gedeon Judex, & ductor populi Isrâëlitici est renuntiatus?

Mortuò Baracò & Debborâ, Isrâëlitæ in pristina denuò scelera, cultusque dæmonum
rela-

relapſi, Magianiticæ ſervituti addicuntur. Verum dum tantis oppreſſi malis divinum implorant ſubſidium, DEUS Gedeonem populi Ducem, ac libertatis vindicem eſſe voluit. Quod ubi Gedeon è cœleſti Internuntio cognovit, non ante provinciam ſibi delatam accepit, quàm DEI ſibi voluntas certioribus ſignis demonſtrata fuiſſet. Neque contentus miraculo, quò Angelus ſolo baculi contactu ignem è petra elicuerat, carnes & panes ſuperimpoſitos exedentem, geminum inſuper prodigium non tam ſuâ, quàm comilitonum cauſâ à DEO poſcit; ac primò quidem vellus ut ovillum, in area ſubdiali expanſum, rore antelutano perfundatur, terra omni reliqua prorfus intacta; deia verò ut hæc circumcirca madefiat, vellere penitus ſicco. Quo duplici oſtento confirmatus, impoſito ſibi oneri humeros ſubjecit.

2768.

II. Quos milites Gedeon adverſus Madianitas in aciem eduxit?

Duorum & triginta millium exercitus in armis jam ſtabat; verum DEUS numerum imminui voluit, nè victoriam ſuis tribuerent viribus Iſraëlitæ. Itaque præconis voce admoniti, ut, qui animo eſſent meticuloſi, abirent, ad duo & viginti millia à ſignis ſunt dilapſi; decem duntaxat millibus perſiſtenti-
bus. Sed & hic numerus, DEO jubente, contrahendus erat, iique ſoli in hoſtem educendi, qui è vicino amne aquam, manu con-

cava

cava haustam, canum instar lingerent, quorum trecenti duntaxat erant, reliquis, qui proni flexis poplitibus biberent, domum remissis. 2768.

III. *Quô modô Madianitæ victi, ac prostigati fuerunt?*

Nova prorsus atque insolita bellandi methodo; nam Gedeon DEI jussu trecentos hos milites non aliis armis, quàm suâ quemque tubâ, & face hydrix inclusa instruxit. Nocte concubia hostium castra cingere, datoque signotubas pariter inflare, lagenas collidere, tedisque in altum sublatis, vociferari cœpêre: *Gladius Domini & Gedeonis!* Quæ omnia tantum hostibus terrorem incussêre, ut mutuis sese cædibus ipsi conficerent, trecentis illis militibus, nè exerto quidem gladio, tantam hostium cladem impunè aspicientibus. Annô M. bis millesimô, septingentesimô sexagesimô octavô. (2768.)

§. 2.

Abimelech, & Jephthe.

I. *Quæ Abimelechbi fuit fortuna?*

Erat hic Gedeonis filius, qui parente è vivis sublato, principatum sibi arrogaverat. Hunc in finem septuaginta fratres, præter natu minimum, qui è tyranni manibus evaserat, obtruncari jussit. Verùm haud diuturna ejus erat dominatio, DEO justas à fratricida pœnas celeriter repente. Dum igitur in oppugnatione urbis Thebes turri ignem admove-
rag

rat, una ex propugnantibus lapideis molaris fragmen tanta vi in tyranni caput dejecit, ut cerebrum diffluxerit. Nè tamen manu mulieris interiisse diceretur, armigero se jugulandum præbuit. Annò M. bis millesimò octingentesimò tertio. (2803.

II. *Quis huic in præfectura successit?*


Thola, & huic Jair, quo jus dicente, populus nova iterum servitute ab Ammonitis & Philisthæis premi cœpit.

III. *Quis populum denuò in libertatem vindicavit?*

Jephte, proximus in prætura successor. Hic signa cum hoste collaturus vovit, DEO se immolaturum, quidquid, relatâ victoriâ, domum revertenti primùm occurrisset. Occurrit prima omnium filia unica, parenti victoriam gratulatura. Stetit promissis heros, ac filiam elapsis, quod unum rogaverat, binis mensibus, collum ultro porrigentem suamet obtruncavit manu. Annò ab orbe condito bis millesimò octingentesimò, quadagesimò nonò. (2849.

IV. *Quinam à morte Jephte ad Samsonem usque Reipublicæ gubernacula tenuère?*

Abesan, Ajalon, & Abdon, de quibus nihil singulari dignum memoria Sacræ tradunt Literæ.



CAPUT IV.

De ultimis 3. Judicibus, Samsone,
Heli, & Samuele.

§. I.

Samson.

*I. Quis populum Hebraum Philistinorum
servitute liberavit?*

Samson, qui jam indè à puero DEO conse-
cratus, Nazaræorum ritu, intonsam alere cæ-
sariem, vinóque & omni potu inebriante ab-
stinere divinitùs jubebatur.

*II. Num hęc Philisthæos acie, apertóque
Marte prosligavit?*

Hard istud quidem; varias tamen clades,
DEO impellente, unus ipse solúsque iis intu-
lit. Ac primò quidem trecentarum, quas ce-
pit, vulpium singula paria, inter se colligata,
innexis ad caudas tedis ardentibus, in Philis-
thæorum segetes jam maturas immisit, gras-
sante latè flamma, & vineas insuper ac oli-
veta depascente.

*III. Quà viâ è manibus Philisthim, qui capti-
vum abduxerant, evasit?*

Cùm viris Juda tantum non esset animi,
ut minacia Philistæorum postulata rejicerent,
Samsonem iis vinctum tradidère, ob incensas
segetes pœnas daturum. Quem dum Barba-
ri, successu ovantes, velut feram retibus im-
plicatam, secum abstrahunt, ruptis repentè
funibus, & areptâ, quam fortè viderat, asini
maxil-

maxillâ, mille omnino Philisthæos trucidat, cæteris fugâ dilapsis. Indè labore simul sitisque confectus, fontem, ex ipso eadè maxillâ dente molari, inaudito prodigio ubertim profluentem, fufis ad DEUM precibus impetrat.

IV. Quid in urbe Gaza memoratu dignum gessit?

Ibidem pernoctanti novas iterum insidias parant Philisthæi, præclusis omnibus evadendi viis. Qua de re divinitus edoctus Samson, media nocte confurgit, portæque fores geminas, cum postibus revulsas, ad vicini montis verticem humeris deportat.

V. Quibus demum artibus Philisthæi Samsonem circumvenère?

Fraude arque insidiis Dalila, quam amore infano deperibat. Hæc præcibus, lacrymis, blanditiis amasium urgere non destitit, quoad lassus tandem est, robur suum omne in crinibus residere, quibus proin dormienti detonsis, captus ab hostibus, & oculo utroque est orbatus. 2898.

VI. Quas hic penas tandem de Philisthæis sumpsit?

Horum primoribus ad solemne sacrificium & epulas congregatis, Samson ludicrum daturus spectaculum producit. Dum cæco huic ludioni ab omnibus certatim illuditur, hic implorata DEI ope, quâ pristinas sibi vires reddi petiit, columnas geminas, quibus tota incumbebat ædificii moles, utraque pre-

hen-

hendens manu, tam validè concussit, ùt domo penitus subversa, se, & quotquot spectatum confluerant, comuni ruinâ opprèsserit, simulque finem diurnæ servituti attulerit. Annò M. bis millesimò octingentesimò nonagesimò nonò. (2899.)

§. 2.

Heli, & Samuel.

I. Quid de Heli sacer codex meminit?

Is Pontificis simul ac Judicis munere fungebatur, cui duo erant filii Ophni, & Phinees, Sacerdotalis ambo Officii Adjutores, sed enormibus uterque sceleribus & sacrilegiis infames: nam & partem ex iis, quæ offerebantur, sibi decerpere, & oblatoris, quod optimum, electissimùmque erat, vi præripere non dubitârunt. Connivebat interim parens, vel certè leniùs, ac scelerum exigebat atrocitas, delinquentes castigabat.

II. Quæ idcirco pænæ Heli solvendæ erant?

Ut Hebræi, à Philistæis nuper profligati, felicioribûs auspiciis pugnam redintegrarent, Arcam, Divini oraculi sedem, in castra secum attulerant, propiore, atque adeò propitio magis Numine dimicaturi. At secus evenit; nam occisa Hebræorum triginta millia, Arca ab hoste capta, cæsi Ophni, & Phinees, Heli ipse, nunciò funestæ cladis exceptò, è sella corruens, subitò est extinctus. 2939.

III. Quis post Heli interitum populo præfuit?

Samuel Vates sanctissimus. Hic nihil anti-

E

quius

quibus habuit, quàm ut populus offenso cum Numine rediret in gratiam. Igitur comitia, in Mitha celebranda, edicit, ubi cœtui universo mentem suam pluribus exponit, placulari indicto Sacrificio. Néc inobsequentem habuit populum, quippe qui, ejurato idolorum culto, DEO totum se dicare seriò decreverat. Necdum dimissa erat concio, cum Philisthæi, hac maxime occasione utendum rati, inermem turbam armati aggrediuntur. Verùm Samuel & prece & sacrificio novas è cœlo suppetias impetravit, horrenda videlicet tonitrua, ignes & fulmina, quibus hostes territi, & in fugam acti, atque ab insequente populo ingenti clade sunt affecti. 2960.

IV. Quid captâ Domini Arcâ factum?

Ad hanc remittendam DEUS Philisthæos gravissimis calamitatibus compulit, pestilente fevissima fœdisque ulceribus homines, agros verò immeasâ murium copiâ depascente. Itaque Arcam plastro novo, cui trahendo binas vaccas, vitulos recens enixas, junxerant, impositam, sine duce itineris & vectore cum anathematis dimittunt. Hæ recto tramite Israëlitarum regiones petunt. Cumquæ urbem Bethlames attigissent, incredibile dictu est, quanto populi plausu ac latitiâ Arca sit excepta. Sed continuò gaud a gravior intercepti luctus viris septuaginta è primoribus, è plebe verò promiscua quinquaginta millibus repentina morte sublati, quod Arcam curiosius inspicere sint ausi.

V. Cur dignitas judiciaria cum Samuele expiravit?

Cum Samuel filios reliquisset à paterna pietate, atque integritate omnino degeneres, antequam in hoc arripuit populus Regem postulandi, qui aliarum gentium instar belli pacisque renumporibus ipsos regeret. Quorum desiderio Samuel, consulto prius Numine, annuit.

Animadversiones ad quartam Historiæ Biblicæ partem.

I. Quenam quarta hac mundi ætate Reipublica Isrâëlitica forma erat & conditio?

Cum DEUS populi Duces, Rectorésque in plurimum ipse designare, iisdemque, quid factum, quidve cauto opus; singulatim dictare consueverit, regimen illud nec Monarchicum, nec Aristocraticum, nec Democraticum, sed rectius Theocraticum dixeris. Ad populum verò quod attinet, omni Euripo mutabilior erat; jam enim affluente rerum copia, in omnia se scelera effundebat; jam resplente adversitatum vento, ad DEUM bonorum omnium Oceanum, se recipiebat; jam Regum & gentium vicinarum perversos mores, Deosque sectando in servitutem est traditus. 1. Chusano. 2. Egioni. 3. Iabino. 4. Madianitis. 5. Ammonitis. 6. Philisthæis: jam poenitentiam duce, ad DEUM & meliora conversum, servitute iterum exemit 1. Othoniel, 2. Aod, 3. Debbora, cum Baraco, 4. Gedeon, 5. Jephthe, 6. Samson, omnes divinitus ex-

citati, cœlestibûsque idcirco præfidis & armis instructi.

II. Quis per reliquum terrarum orbem tunc status erat?

Regnum Assyriorum & amplitudine, & potentiâ cæteris omnibus præstabat. Regia sedes Ninive erat, ubi Assyrii Reges dicam, an ventris mancipia, genio unicè indulgebant. Cultus veri Numinis mundô ferme totô exulabat, regnante ubique idololatria. In hac tamen tenebricosissima pudendorum scelerum nocte lucidissimi instar sideris refulgebat, eximie prorsus fortitudinis & patientiæ radios quaquaversum diffundens, Job Esau pronepos, è regione Hus, Arabiæ contermina, oriundus.

III. Cur DEUS populum Israëliticum tot annorum intervallô per desertas ac invias solitudines circumduxit?

Cùm ut toties, tamque protervè obmurmurantes castigaret; tum ut hostes, quemadmodum scelerum suorum mensuram paulatim compleverant, ita, pœnâ parâ passu eos insequente, pederentim attererentur.

IV. Cur DEUS Moysis corpus in sepulchro prorsus ignoto condi voluit?

Ut populo illi, ad idololatriam longè propensissimo, occasionem omnem præriperet, divinos Moyse honores decernendi.

V. Quanam erant 12. Tribus Israël?

Hæ à decem Jacobi Patriarchæ, & duobus Josephi filijs nomen & genus traxêre, videlicet: 1. Tribus Juda. 2. Benjamin. 3. Simeon,

meon. 4. Dan. 5. Nephthali. 6. Gad. 7. Afer. 8. Issachar. 9. Zabulon. 10. Ruben. 11. Ephraim. 12. Manasse, è quibus Manasses patruo suo Levi, ad sacerdotalia munia speciatim delecto; Ephraimus verò Josepho parenti est subrogatus.

VI. Quando & à quo duodecim his Tribubus terra illa promissa fuit divisa?

Tribui Ruben & Gad cum dimidia Tribu Manasse terra trans Jordanem à Moyse; reliquis verò Tribubus cis Jordanem à Josue est assignata. Sola Tribus Levi, quæ, utpote ad sacra ritè curanda divinitus destinata, agros colere non poterat, nullam terræ portionem accepit, sed reliquis Tribubus, ut pietatem ubique sereret, permista, frugum omnium decimis, primitiis, & iis, quæ DEO offerebantur, largè sustentabatur, attributis ad habitationem urbibus octo & quadraginta, è quibus sex asyli jure donatæ.

P A R S V.

Reges Hebræorum usque ad captivitatem Babyloniam.

Hic memorandus est 1. Rex Saul. 2. David. 3. Salomon. 4. Omnes Reges Juda.

C A P U T I.

Rex Saul.

§. I.

Saulis res gestæ, ejusque repudiatio.

E

I. Qua

I. Qua ratione Saul ad regiam dignitatem est evectus?

Cùm Samuel DEO iubente jus Regis, seu potius regii juris abusum, malorumque & onerum, quæ regio sub dominatu exantlanda essent, illiadem populo prænuñtiassèt, nec tamen is à Rege petendo desisteret, Saulem DEUS destinavit, habitu corporis & majestate inter ceteros eminentem, quem Samuel Regem inunxit, cùm amissos Cis parentis sui asinos conquiriturus, vatèmq; hac de re consulturus, ad se divertissèt. 2962.

II. Quos præcipuè hostes Saul sibi infestos habuit?

Philisthæos, & Amalecitas, Hebræo semper nomini longè infensissimos. Philisthæi à Jonatha, ejusque armigero, facto repentiè in castra impetu, magno primùm terrore compleri, tum dissipatis ordinibûs, mutua se eadē contrucidare, ac demum à superveniente Saule ipso penitus profligari ceperunt.

III. Quem exitum habuit expeditio contra Amalecitas suscepta?

DEUS Sauli per Samuelem Prophetam denuntiari jussit, ut Amalecitis, qui scelerum suorum jamjam explerent mensuram, bellum inferret. De victoria nè dubitaret; id tamen caveret, de præda & exercitu hostili nè quid reliqui faceret, sed pecora æquè ac homines cum suppellectili universa igne, ferròquè deleret. Vicit Saul hostes; at se ipsum ac vincentem. Deoque submitteret, imperare sibi

fibi haud potuit, Rege Agag ad triumphum credo, praeda verò opumque et sacrificium, contrà ac DEUS mandaverat, reservata.

IV. Quid DEUS Regi contumaci, ac fractuario per Samuelem denuntiari jussit?

Præstabiliorem omnî victimâ esse obedientiam, quam quia arrogante contumacia abjecisset, ipsum quoque à DEO abjectum, Regemque alium meliorem & obsequentio- rem eidem susceptum iri. Mox Samuel Agagum pinguissimum, ad se adductum, suapte dextera in frustra concidit.

V. Quem DEUS Regem in Saulis locum subrogavit?

Davidem, Isai filium natu minimum. Hunc, dum annum agebat circiter vicesimum, atque ad eam diem pascendis parentis sui gregibus operam dabat, Samuel rure accitum, paterno in oppido Bethlehem privatos intra parietes, nè res Sauli suboleret, Regem inunxit. 2964.

§ 2.

Saulis, à DEO reprobati, facinora.

I. Quid Saul factum, ex quo David Rex est inauguratus?

Dum hic divino impelleret & agitur spiritu, ater illum genius, humori melancholico permixtus, in furem sepe agit, ac prope ad insaniam redegit. Maio huic stenuum ac præseus remedium allaturam sperant muscam. Igitur in citharædum inquiritur; nec alius magis idoneus creditur Davide, qui proin è pa-

scuis ad aulam accessus, suavi vocis ac sistim concentu turbulentos animi motus mirè sedavit, Regi exinde acceptissimus.

Quid de gigante Goliath memorandum?

Cùm Philisthæi novò iterum bellò Hebræos lacefferent, exercitus uterque edito in colle vicina locabat castra. Inter barbaros Goliath præcipuè eminebat, & mole corporis, & armorum pondere, & animi ferociâ planè gigas. Hic per dies 40. virum sibi ex omni Israëlitarum numero sisti quotidie iterata provocatione postulat, qui singulari secum certamine de rei summa decernat. At nemo unus erat, qui cum immani hoc monstro pedem conferre auderet, donec tandem David, fortè fortunâ à parente cum comœatu ad fratres missus, cum thrasone hoc in arenam descendere animum ultro induxit. Facta igitur à Rege alexæ tentandæ potestate, non nisi armis pastoritiis, baculò, fundâ, & quinîs è torrente lapidibûs instructus, adversus hostem procedit, moxque fundâ circumactâ, lapidem vî tantâ librat in Goliathi frontem, ut carnea hæc moles ingenti cum fragore in terram præceps rueret. Jacenti ac palpitanti caput gladiò, ex adversarii vagina eductò, confestim præcidit victor, summo ubique exceptus plausu, & secunda populi gratulantis admurmuratione. Verùm unde David summam inire debuerat gratiam, indè maximam sibi conflavit invidiam, à Saule ipso, cujus thronum vel capitis periculo stabilierat, indignissimè divexatus.

III. Quas

III. Quas Saul Davidis vitæ insidias struxit?

Hunc ut è medio tolleret, nullum non lapidem movit. Ac 1. quidem pristinò illò furoris cæstrò correptus, Davidem, citharâ malo huic remedium afferre parantem, lanceâ semel atque iterum appetiit, confixurus haud dubiè fidicinem, nisi hiè modò capitis declinatione, modò celeri fuga ictum frustrâset.

2. Filiam suam Davidi eò demum pactò nuptui daturum se recepit, si centum Philistæos jugulâset, spe fretus, fore, ut ipse prior occumberet. Verùm is ducentis eorum cæsis, Micholem, invito licèt socero, uxorem duxit.

3. Davidis domum de nocte militari undiquè coronâ cingi iussit, ut die illucescente captivum adducerent. At Michol impios parentis conatus elusura, maritum nocte intempesta per fenestram fune demisit; ac nè facultas ei tempusque deesset, quo in tutum se reciperet, ligneum hominis simulacrum ad fallendos milites in lecto reposuit.

4. Cùm Saul Davidem ad Samuelem confugisse intellexisset, missis illico satellitibus aliis atquè aliis fugientem intercipi, vincitumque ad se perducì iussit. At enim, vix pedem hi in ades Prophetæ intulerant, cùm mox divino afflati Spiritu, non jam vincula, sed oracula promere incipiunt. Quod ipsi quoque Sauli, paulò post supervenienti, evenit, è sanguinario parricida in Prophetam fatidicum repentè mutato.

5. Saul Davidem per desertas solitudines, montes & sylvas oberrantem valido cum exercitu est insecutus, junctis eum viribus oppugnaturus, suamque in potestatem redacturus. Sed irritæ fuere hæ omnes molitiones, DEO Davidem cœlestibus ubique firmante præsidiis.

IV. *Qui verò tot inter adversa se gessit David?*

Ut virum pium, patientem, ac fortem de-
cet. Vitam ut plurimum fugiendo servavit.
Ac primò quidem, ad Samuelem Prophetam,
dein ad Achimelechum Sacerdotem, inde in
desertum est digressus. Ubi quàm asperè ac
inhumaniter à Nabalo, tam prolixè comiter-
que ab ejus uxore Abigail est tractatus. Tan-
dem cum apud populares suos nusquam ser-
ro esse liceret, ad ipsum Philisthæorum Re-
gem Achis confugit, qui urbem Siceleg havi-
tandam concessit. Nec deerat Davidi occasio
Saullem, hostem suum juratum, perdendi,
tunc præcipuè, quando Regi ad eum, quò se
ipse receperat specum, fortè divertenti, cum
caput potuisset, non nisi chlamydis regiæ par-
ticulam præsecuit: aut quando intempestæ no-
ctis silentio in castra, ipsùmque adeò Regis
tabernaculum, Abisai comite, ingressus, ha-
stam solam cum aquæ scypho dormienti ab-
stulit. Quò compertò, Saul propensissimum
in se Davidis animum perspexit quidem; nec
tamen destitit insontem persequi.

V. Quò tandem mortis genere Saul occubuit?

Dum hic in pugna cum Philisthæis inauspicatò inieci, grave vulnus accepisset, nè morituro hostis insultaret, adstantem rogavit armigerum, ferrò ut se perimeret, quò impium obsequium averfante, suus ipse carnifex, in enseni præ desperatione incubuit. Hujus mortem non minore luctu David, quàm gaudio Philisthæi sunt prosecuti, qui demortui caput, cervicibus abscissum, per urbes suas omnes, velut in triumpho circumtulère, cadavere è muro Bethsan ad ludibrium suspensò; quod tamen Jachita de nocte sublatum, publico ubi in lectu terræ mandarunt, Davide officium, curando funeri impensum, prolixè laudante, ac remunerante. 2979.

C A P U T II.

De Rege Davide.

§. I.

Davidis præclara initia, ejusque lapsus.

I. Quando David regni possessionem adit?

A Saulis obitu, consulto prius Numine, cum suis Hedronem commigravit, ubi annò ætatis trigessimò Rex palam inunctus, annos septem cum dimidio soli Tribui Judæ præesse cœpit, Isbosetho, Saulis filio, reliquis 11. Tribubus imperante; quo per ficarios interempto, tandem totius Israël, id est, 12. Tribuum Rex inauguratus est David.

II. Qui-

II. Quibus firmamentis, praesidiisque Imperium suum stabilivit?

Pietatis praecipue, ac religionis cultu!, & optimorum administrorum delectu. Pietatis specimen planè eximium dedit in translatione Arcæ. Erat hæc à pluribus jam annis exul quasi, & propè neglecta; itaque eam David Hierosolymam, quam, profligatis Jebusæis, regni sedem constituerat, transferendam curavit, maximo populi concursu & gratulatione; quam tamen ex improvviso interturbavit repentinus Ozæ interitus, vel quòd Arcam, à solis alioqui Sacerdotibus tangendam, attrectasset Levita; vel quòd eandem, humeris ex lege imponendam, plauastro admovisset, non sinè lapsionis periculo, quod dum propulsare tentat, subito expiravit. Percussus eo casu David, ausus non est Arcam in suam inferre domum; sed in ædes Obededom Levitæ deduci jussit, maximò ejusdem bonò atque emolumentò. Quod ubi nuntiatum est Regi, trimestri exactò, Arca repetitur, solemniore pompa, & apparatu longè magnificentissimo, non jam plaustrò, sed Sacerdotum humeris destinatum ad locum deportanda, ubi Rex ipse regia veste posita, ac lineâ, Ephod dictâ, indutus, Arcæ præsultabat, insultante incassum Michole, superba conjuge sua.

III. Quæ bella gessit David?

Postquam Israël's totius Rex salutatus, ac tertium est inunctus, Hebrone Hierosolymam cum valida suorum manu contendens, Sionis arcem,

arcem, propè inexpugnabilem, pulsâ indè Jebusâis, occupat. Mox armis in Philisthæos conversis, de his geminam, sed multò illustriorem de se reportat victoriam, dum aquam, è cisterna Bethlehemitica à tribus viris fortissimis, perrupta Philisthæorum statione, allatam noluit bibere, sed in omnium conspectu effundens, DEO libavit. Ad reliquos subinde Israëlitarum hostes debellandos progressus, Moabitas, Idumæos, Ammonitas, & Syrios in ditionem suam redegit, stipendiò, quod tot jam annis Hebræi pendere cogebantur, ipsis impolitò; unde auri, argenti, ærisque vis propè immensa ad futuram Templi fabricam est collecta.

IV. Quænam origo fuit belli adversus Ammonitas suscepti?

Miserat Rex David ad Hanonem, Ammonitarum Regem, Legatos, qui pro mutua amicitia mœrorem, ex parentis obitu conceptum, abstergerent. Verùm hîc viros honestissimos pro speculatoribus habitos, procerum instinctu dimidia parte barbæ & capilliti attonsa, vestibusque ad summum opprobrium mutilatis, remisit. Hanc injuriam, contra jus gentium Legatis illatam, ulturus David, Ammonitas cum subsidiariis Syrorum copiis, ingenti clade iterum iterumque illata profligat, urbemque eorum regiam Rabbam solo æquat, incolis, accolisque crudelî quidem, digno tamen tot tantisque sceleribus supplicio affectis.

V. *Qua occasione Rex ille pœnitissimus ad nefarium adulterii, & homicidii scelus est inductus?*

Otio, & incautiore fœminæ aspectu; cùm enim post epulas ac meridiationem in solario domûs regiæ otiosus deambulare, in bethsabeam, eximia pulchritudine fœminam, oculos coniecit. Ex quo aspectu, veluti scintilla, vetiti amoris incendium longè tristissimum est exortum, non nisi copiosis pœnitentiæ lacrymâs restinguendum. David porrò dum adulterii crimen occultare parat, novo, eoque majore scelere cumulavit, innocentis nempe Uriæ cæde, quem in oppugnatione urbis Rabbæ loco pugnæ iniquissimo exponi, atque à suis deferri jussit, Ammonitarum telis conficiendum.

§. 2.

Davidis pœnitentia, & vitæ exitus laudatissimus.

I. *Quando, quâve ratione David cœpit restipiscere?*

Ut primùm filius, in adulterio susceptus, hanc lucem aspexit, adest mox Nathan Prophetes, à DEO missus, propositaque oviculæ raptæ parabolâ, Davidi gemini sui sceleris atrocitatem vehementer exprobrat, eidemque, crimen admissum ingenti cum dolore fletuque confitenti ac detestanti, culpæ quidem gratiam facit; non itèm pœnæ multiplicis, idcirco subeundæ, quam non modò non

recu-

recusavit, sed libentî etiam animô suscepit David. Annô M. bis millesimô nongentesimô nonagesimô nonô.

II. Quenam erant hæ pœna?

1. Mors filii è Bethiabea suscepti. pro cuius vita proroganda multas preces & lacrymas parens fudit. 2. Ammonis filii cædes, ab Absalomo patrata. 3. Absalomi adversus parentem rebellio.

III. Quid Absalomum ad tantum scelus impulit?

Insana regnandi cupiditas degenerem filium eò adegit, ut patrem solio & vitâ deturbare decrevit. Quare contracto ingenti exercitu, ad urbem regiam Hierosolymam occupandam properat; unde tamen pramonitus David, nudis pedibûs, flens, & operto capite, reorum more, fugâ cum suis se proripuit. Fugientem Semei, perfrictæ frontis homo, non sibilis modò & convitiis, sed & lapidibus appetit, tam atrocem injuriam morte haud dubiè luiturus, nisi Rex mansuetissimus, iustissimam DEI ferientis manum hic quoquè agnosceret, submissequè deosculans, suorum impetum cohibuisset.

IV. Quem tandem impius Absalom perditionis suæ fructum tulit?

Viginti suorum millibûs cæsis, cæterisque in fugam actis, dum ipse quoque, nullo infidens, ex hostium manibus tentat evadere, capillis ramotæ quercui implicitis, cælum inter ac terram hæsit medius, quem Joab, re intellecta,


lecta, confestim accurrens, tribus lanceis confodit. Hanc filii sui perditissimi mortem, non tam præsentem hanc, quam æternam illam, David acerbissimo luctu, ejulatione & lacrymâs prosequabatur, quas Joab omnî licet eloquentiæ vî adhibitâ, abstergere vix potuit.

V. Cur lues pestifera Israël Régem invasit?

Ob gravia populi delicta iuxta DEI permissionem factum est, ut David non sine vanitatis & arrogantiae nota universum bellatorum numerum iniri juberet. Quapropter DEUS & hanc Regis, & multò graviores populi noxas castigaturus, misso Gade Propheta, optionem facit aut famis triennis, aut belli trimestris, aut triduanæ pestilentiae eligendæ. Quam ultimam cum præoptasset David, tridui spatiò septuaginta hominum millia interiêre. 3017.

VI. Cuinam David ante suum à vita discessum regni gubernacula tradidit?

Salomoni, viginti & ampliùs annos nato, exclusò Adoniâ, qui, cum & nascendi prærogativâ, & Optimatum quorundam præsidio subnixus, regnum affectasset, & hoc, & vitâ ipsâ est privatus. David porrò annò regni sui quadragesimò, ætatis septuagesimò, vitam cum summa gloria posuit, successorè Salomone sanctissimâs monitis instructo. 3019.



C A P U T III.

De Rege Salomone.

§. I.

Salomon Regum sapientissimus.

I. Quæ Regni ejus fuere initia?

Longè auspicatissima, sedente ad Imperii clavum ipsâ sapientiâ, quam ille, jussus à Deo, quod vellet, petere, elegit præ divitiis & gloria; quæ tamen ambæ, velut pedes quæ dominam illam suam secutæ, Salomonem mortalium omnium felicissimum reddidère. 3020.

II. Ecquodnam sapientia hujus specimen sacri Fasti commemorant?

Cùm duæ mulierculæ, quarum utraque infantem vivum sibi vindicabat, mortuum verò & ab alterutra in lecto oppressum, utraque adjurabat, ad Salomonem provocassent, Rex litem hanc, oppidò intricatam, ex ipsius naturæ indicio ac testimonio diremprurus, infantem vivum gladiò dillecari medium, & utrique partem dari jussit. Hic verò mox matrem natura prodidit: quæ enim infantem dividi postulabat, supposititia; quæ autem vivum servari petiit, mater vera judicata est.

III. Quò præcipuè monumentò Salomon nominis sui memoriam immortalitati commendavit?

Magnificentissimâ illâ Templi toto orbe celeberrimi structurâ, quam annò regni sui quartò, ab orbe condito ter millesimò vige-

simò tertiò moliri cœpit, ac septimo pòst anno ad fastigium perduxit, ducentis & ampliùs hominum millibus hac in fabrica occupatis, è quibus Israëlitarum triginta millia, profelytorum, qui ligna & lapides parabant, octoginta, bajulorum septuaginta millia, operis Præfectorum tria millia & sexcenti, non annumeratis tot hominum millibus, quos Hiram Tyri, & Pharao Ægypti Rex submiserat. Tanta porrò arte atque industriâ ligna & lapides præparabantur, ut sinè instrumentorum fabrilium usu, ac strepitu jungi inter sese postmodum, aptarique potuerint.

IV. Num ratam DEUS, gratiamque habuit operis hujus molitionem?

Ut cum maximè: id quod DEUS in solemnì Templi hujus dedicatione geminò miraculò comprobavit, quando & nebula, DEI præsentiam testata, non sinè lucida caligine sacram Ædem implevit, & ignis, cœlo delapsus, holocausta & victimas paratas combussit. Tenuit hæc solemnitas septem dies, quò temporis intervallò mactata boum viginti duo, arietum centum ac viginti millia.

V. Quid Reginam Sabe Jerosolymas ad Salomonem invisendum accivit?

Admiranda illa Salomonis sapientia juxta ac magnificentia, quæ in ore atque sermone omnium percrebuerat. Hanc igitur exploratura coràm & periclitatura, magno cum comitatu Hierosolymam appulit. Cumque Templi ac regię domûs majestatem, sacrificiorum

magni-

magnificentiam, mensarum apparatus, servorum disciplinam, atque alia hujusmodi, præcipuè verò summam Regis in ænigmatibus ac difficillimis quæstionibus enodandis sapientiam perspexisset, attonita ac penè stupore correpta, fateri non dubitavit, minora longè esse, quæ priùs auribus, quàm quæ nunc oculis usurpâisset.

§. II.

Salomon è sapientissimo insipientissimus.

I. Quibus tandem præstigiis Regum sapientissimus usque adeò infatuatus est?

Amor insanus Regem illum, tam pium antehac & sapientem, vergente jam ætate, eò tandem dementiæ adegit, ut, qui verò priùs Numini Templum augustissimum incredibili sumptu erexerat juvenis, jam senex, nè mulierculis displiceret, vanis dæmonum simulacris delubra & aras non excitârit tantùm, sed thus quoque ac victimas ipsis obtulerit, non jam Rex, sed abjectissimum Veneris ac dæmonum mancipium.

II. Num DEUS hanc tantam impietatem inultam dimisit, ac impunitam?

Haudquaquam; nam ubi Salomon effrænatissimis cupiditatibus habenas laxando sapientiam, pietatem, pudorem, gloriam, existimationem, robur mentis & corporis, valetudinem, divitias, fructus annuos, propè immensos, totque insuper tributa & vectigalia, exactionibus acerbissimis extorta, fœdè ac impiè dissipavit, tandem DEUS post iteratas

monitiones, severamque ingratae mentis exprobrationem, non tantum regni scissionem, decemque Tribuum defectionem ei denuntiari iussit, verum etiam hostes infestissimos, extraneos æquè ac intestinos contra ipsum suscitavit. Inter quæ calamitatis publicæ præludia Salomon vehementi tristitiâ, luctu & angore, multisque corporis & animi morbis, quos intemperantia peperit, confectus, annò ætatis sexagesimò, regni quadragesimò, ità excessit è vita, ut ancipitem de salute sua conjecturam reliquerit posteris; cum sacri Annales, qui crimina ejus gravissima recensent, nusquam meminerint pœnitentiæ.

III. Quis, Salomone defuncto, regni erat status?

Quod ad eam diem unicum erat, in duo postea est divisum, Judaicum nempe, & Israëliticum. Illud Roboamus, cæterique Davidis posteris; hoc Jeroboam Ephraimita primum, cum diversarum Tribuum Reges administrarunt. Scissioni, præter paterna scelera, causam præbuit Roboami imprudentia; hic enim populi nomine rogatus à Jeroboamo, ut durissimum tributorum jugum, à Salomone impositum, minueret, rejectò seniorum consiliò, ex juniorum sententia, superbè, minaciterque respondit. Quibus verborum aculeis exulcerati jam antea animi tantoperè exasperabantur, ut decem omnino Tribus, Salomonis stirpem execratae, regnum Jeroboamo detulerint, duabus duntaxat Tribubus, Judâ, & Benjamin Roboamo adhærentibus. Nos
de

de Israël primùm, tum de Regibus Juda
agemus.

C A P U T IV. De Regibus Israël.

Horum 19. numerantur, scelerati ad unum
omnes, & impii idolorum cultores, qui Re-
gnum Israël obtinere annis, ferè ducentis
quingenta quatuor. Nos hic 1. percen-
sebimus novem Reges usque ad exstirpationem
impie stirpis Achab. 2. Reliquos decem
usque ad everisionem Regni Israëlitici.

§. I.

Novem Reges Israël usque ad exstirpationem
impie stirpis Achab.

I. Quomodo primus Israëlitarum Rex Jeroboam Regnum administravit?

Ut nemo pejus; quippe qui per Religio-
nis, quæ regnorum omnium basis est firmissi-
ma, everisionem thronum sibi stabilendum
duxit; veritus enim, nè Israëlita ad statuta so-
lemnia Hierosolymam confluentes, ad Re-
gnum Juda paulatim deficerent, illuc sacro-
rum causâ eos proficisci veruit. Ac nè Tem-
plô, arisque & sacrificiis carerent sui, duo
delubra in præcipuis regni urbibus excitavit,
vitulûmque aureum utrobique adorandum
proposuit Sacerdotes non de Tribu Levi, sed
vili plebecula delegit, festos dies, ritus, sa-
crificia instituit, acque ita, dum nova religio-
nis specie, pessimis artibus introducta, re-
gnum firmare voluit, illud planè pessumde-

dit, imperiò dejectus & vitâ, æternâque idcirco infamiâ notatus, cùm annis regnâisset duobus & viginti, necdum completis.

II. Quis Jeroboamô successit?

Nadab filius, paternæ impietatis æmulus, quem anno post altero Baasa Israëlitiçi exercitûs ductor, de Tribu Issachar oriundus, per insidias interemit, & hac eadē, imò universæ stirpis Jeroboamicæ excisione aditum sibi ad regnum munivit, quod annis tribus ac viginti pessimè administravit. Nec Ela filius parente suo melior fuerat, quem, cùm vix annum secundum regnando inchoâisset, Zambri, equestris turmæ ductor, cum tota Baasæ familia extinxit.

III. Quàm diu regnavit Zambri?

Hunc Amri septimo post die, quàm regnum invaserat, in urbe regia Thersa obsessum, eò furoris ac desperationis adegit, ut se, suosque unâ cum domo regia combufferit, hac ratione & corpus atrocioribus, quæ scelestus parricida impendere sibi noverat, tormentis, & regias opes æmulo prærepturus. Exusta regiâ, belli civilis exarsit incendium, his Amrium, illis Thebniū Regem poscentibus, donec Amri, competitore violenta morte sublato, solus rerum potitus, regni sedem Samariam transtulit, ubi annò imperii duodecimò vitam sceleratè actam pari exitu conclusit.

IV. Quis ab Amri obitu Regni habenas moderatus est?

Achab, Amri parentis sceleratissimi sceleratior filius. Hunc jam antè à patre impio deprav-

depravatum, ad omne facinus impulit uxor longè impiissima Jezabel, frustrà reclamante ac dehortante Elia Propheta sanctissimo, qui, cum nec monitis, nec prodigiis cœlestibus quidquam proficeret, tandem DEI jussu tam Achabo ipsi, quàm nefariæ ejus conjugi, totique posteritati excidium denuntiat: & Achabi quidem sanguinem lincturos canes; Jezabelis verò cadaver in prædam iisdem cessurum. Nec aliter evenit, ac Vates prædixerat; nam Achab annò regni vigesimò secundò in prælio contra Regem Syriæ suscepto, sagittâ confossus occubuit, canibus, dum currus, tabò fœdatus, in piscina Samariæ elueretur, cruorem abstersum lambentibus. 3188.

V. Quid geminis Achabi filiis, Ochoziâ & Joramâ factum?

Ochozias, parentis pessimi nihilo melior filius, unò duntaxat annò Achabò superstes fuit, qui cum per cœnaculi cancellos prolapsus, conquassati corporis remedium à Beelzebub Accaronitarum idolo peteret, justò DEI judiciò, & regnò, & virâ est deturbatus, fratrique Joramò natu minori succedendi locum fecit. Hunc annò regni duodecimò Iehu, qui ad excindendam impiam Achabi stirpem Rex Israëlis divinitus est electus, in via occurrentem, jaculò transfixit. Indè Rex novus cum copiis urbem Jezraël ingressus. Jezabelem è fenestra per ipsos domesticos præcipitari jubet, equorum ungulis proterendam,

dam, atque à canibus, ex Eliæ prædictione, discerpendam. 3179. Sub hæc tempora Eliæus virtutibus, vaticiniis, miraculis claruit.

§. 2.

Reliqui decem Reges Israëlitarum usque ad everfionem Regni Israëlitici.

I. Qua laude Jehu præfuit?

Hic initio regiminis sui ab idolorum cultu alienior esse videbatur, utpote qui non tantum impiam Achabi stirpem univerfam, sed execranda quoque Baalis tam fana, quam simulacra cum sacrificulis omnibus toto regno exterminavit, dignus idcirco, qui solus ex omnibus Israëlitis Regibus imperium ad quartam usque generationem obtinuerit. Verum cum nec ipse vitulos aureos, pridem abolendos, sustulisset, ditionem omnem trans Jordanem, & regnum, quod pietatis ac religionis cultu in ævum posteris suis stabilire poterat, impietate sua post annos centum & duos amisit. Obiit annò regni sui vigesimo mortem ingloriam, & præclaris suis initiis prorsus abfimilem.

II. Quinam ex Jehu familia in paternum solium sunt erecti?

Joachaz, Joas, Jeroboam secundus, & Zacharias, scelerati omnes & primi illius Jeroboami imitatores, quorum primus septemdecim, alter sedecim, tertius unum & quadraginta annos, postremus menses duntaxat sex, post

post duodecim ferè annorum interregnum, imperavit.



III. Quinam fuere postremi Israëlitarum Reges?

Sellum, qui Zachariam post Semestre imperium regno & vitâ expulit, utroque & ipse expulsus à Manahem, cum uno non ampliùs mense regnâsset. Manahemo post decem annorum tyrannidem successit Phaceia filius, biennio post sublatus conspiratione Phacee, qui, ubi regnum annis viginti occupaverat, parricidii sui poenas ex lege talionis solvit, ab Osea parricida interreptus.

IV. Quomodo tandem Regnum hoc penitus est eversum?

Postquam Reges Israëlitis omnes à Jeroboamo ad Oseam usque de impietatis palma certârunt, ac populus ad Regum suorum exemplum & mores vitam quoque suam conformaverat, impletâ tandem scelerum mensurâ, ab iis ipsis captivus est abductus, quorum flagitia sibi imitanda proposuerat. Itaque Salmanasar Assyriorum Rex, Samariâ post tertium obsidionis annum expugnatâ, totôq; regnô in suam ditionem redactô, populum cum Rege Osea in perpetuam servitutem abstraxit, quos inter Tobias Vir sanctissimus numerabatur, ut bonis in captivitate solatio, malis verò ad vitam meliorem incitamentô esset.

3314.



CAPUT V.

De Regibus Judæ.

Horum fuere viginti, quorum duodenos priore, octonos posteriore paragrapho referemus.

§ 1.

Duodecim Reges Judæ à Roboamo
ad Ezechiam.

I. Quot ex vicenis his Regibus pietatem constanter coluere.

Quaterni duntaxat, videlicet Josaphat, Joatham, Ezechias, & Josias. Manasses pessimè cœpta meliore fine emendavit: Asa verò, Joas, & Ozias bona initia malo exitu terminârunt. Reliqui duodecim sceleratè vivendo æternam nomini suo maculam inussere. Regnârunt viginti hi Reges universè annos lex & octoginta supra trecentos, ab anno scilicet mandī ter millesimo sexagesimo, ad ter millesimum quadringentesimum quadragesimum sextum.

II. Quo successu Roboam Regnum, 10 Tribuum secessione diminutum gubernavit?

Hunc quoque, perinde ac Salomonem parentem, mulieres perdidere, à quibus jam inde ab adolescentia depravatus, ad omnem dein libidinem ac nefarium idolorum cultum populo facem prætulit. Quapropter iratus DEUS, Sefacum Ægypti Regem innumerabili
cum

cum exercitu in Judæam inmisit, qui munitissimis Regni urbibus captis, Templique & domus regie thesauris direptis, gravia insuper tributa imperavit. Obiit Roboamus anno regni sui decimo septimo, infortunatior longè, quod religionem, quàm quod regnum maxima sui parte perdiderit.

III. Quis eidem in regno successit?

Abiam, mali corvi malum ovum. Hic contra Jeroboamum, qui octingenta millia in aciem eduxerat, cum quadringentis millibus acie congressus, ac propè circumventus, DEI ope implorata, cecidit hostium quinquies centena millia. Nec istamen tantò beneficiò ab imitanda patris impietate absterri potuit. Præcoce igitur fatò, annò nempe regni tertio, è vivis est sublatus, nè diutius DEI beneficiis abuteretur.

IV. Num Asa, ejus successor, felicioribus auspiciis regnavit?

Hujus initia laudatissima fuere; nam idolis & impie superstitionis monumentis ubique abolitis, regnum suum omne repurgavit: hinc in præmium restauratæ religionis Æthiopum decies centena millia internecone delevit. Idem tamen iusta reprehensione non caruit, 1. quòd DEO, cujus opem contra Æthiopes expertus jam erat, diffusus, Syrorum Regis societatem non profano tantum ærarii sui, sed sacro quoque Templi auro sit mercatus. 2. Quòd Prophetæ, indigni fœderis pœnas denunciati, compedes injici, mul-

multosque de populo, facinus hoc palam improbantes, necari iussit. 3. Quod vehementissimo pedum dolore discruciatatus, ad medicos potius, quam DEUM confugerit. Obiit tandem hoc ipso ex morbo anni regni sui quadagesimo primo, funere sumptuosissimo elatus. 3120.

V. Quem hic regni heredem reliquit?

Josaphatum Principem religiosissimum, cui prima cura religionis, altera justitiæ fuit; hinc urbibus ac pagis sacra Legis Doctores, tribunalibus incorruptos dedit Judices. His propugnaculis, religione nempe, & justitiâ, regni sui fines contra hostium incursiones firmissimè præmunivit. His solis armis prodigiosam illam retulit victoriam, quando imensus Barbarorum exercitus, terrore panico divinitus immisso, mutuis se caedibus ad interuersionem usque confecit, tantamque victori incruento reliquit prædam, ut ei exportandæ vix triduum suffecerit. Vitam piè, gloriosèque finit anno regni sui quinto & vigesimo, mundi 3145. hoc unò infelix, quod affinitatem & fœdus contra Syrios cum impio Achabo, & commercii societatem cum Ochozia, Achabi successore, inierit.

VI. Num pari laude Joram filius imperavit?

Hic paterna institutione neglecta, Athaliam conjugem, Achabi & Jezabelis filiam, omnis impietatis & crudelitatis Magistram habuit, qua instigante non solum sex fratres, & quosdam è parentis consiliariis de medio sustulit,

stulit, sed abominanda insuper vituli aurei, & Baalis sacra in regnum Judææ invexit. At mox sentit vindicem DEI manum; nam ab impio hoc Numinis desertore defecerunt Idumæi, Philisthæi, & Arabes, qui Judæâ depopulatâ, regiam ipsam expilârunt, liberôsque omnes, unô Ochoziâ natu minimô super-
vixit, interfecerunt. Ipse verò insanabili vi-
scerum dolore percussus, totôque bienniô di-
rè vexatus, scelestam tandem animam annô
regni quartô evomuit, DEO invisus & homi-
nibus; unde etiam exequiis & sepulchrô ca-
ruit regiô.

*VII. Quid de Ochozia, Athalia, & Joa
memorandum?*

Ochozias paternam, maternâmque impie-
tatem imitaturus, à Jehu Achabicæ stirpis
exterminatore, unâ cum Joramo Israël's Re-
ge occiditur, cùm annô vix integrô sce-
ptrum tenuisset. Indè Athalia thronum,
Ochoziæ filii morte vacuum, occupans,
quidquid supererat stirpis regiæ, sustulit. U-
nus Joas, Ochoziæ filius natu minimus, aviæ
crudelitati ab amita est subtractus, quem in
Templo clâm educatum annô ætatis septimô
Jodas Pontifex paternum in solium restituit,
exturbatâ & occisâ furiâ illâ, quæ sex annis
tyrannidem exercuerat. Tum verò novo cum
Rege caput religio revirescere, & lætam omnia
faciem induere, quoad nempe Jodas, qui
Principem optimis consiliis regebat, super-
stes fuit. At eô vitâ functô, Procerum assen-
tatio-

tationibus corruptus, ab avita religione des-
scivit, sana instauravit, & Zachariam Pro-
phetam, Jojadæ filium, impiis molitionibus
adversantem, in ipso Templi vestibulo lapi-
dibus obruit. Ob quæ, aliæque delicta Ju-
dæa regio à Syris devastata, regni proceres
interempti, Rex ipse in lectulo decumbens
à suis est trucidatus, annò regni quadragesi-
mò, mundi 3196. Circa hoc tempus Jonam
Prophetam DEUS Niniven ablegavit, com-
mune ut urbi excidium denuntiaret; quod ta-
men & Rex, & incolæ pœnitentiâ, seriâque
criminum detestatione in tempore averterunt.

*VIII. Quam laudem Amasias, & Ozias sunt
commeriti?*

Amasiam victum, captumque in urbem re-
giam Hierosolymam triumphali pompâ in-
troduxit Joas Israël's Rex, dirutisque mœni-
bus, & gazâ omni tam sacrâ, quàm regiâ di-
reptâ, eundem sibi vectigalem fecit. Vitam
posuit annò regni undetrigesimò, valida suo-
rum conjuratione oppressus. Hujus in locum
populi studiis suffectus est Azarias, sive Ozias
filius, sedecim annorum adolescens, qui, quàm
diu DEO adhæsit, cœlesti protectus auxiliò,
regnum felicissimè administravit; at dum sui
oblitus in multis sacerdotale involat, mox
leprâ divinitus afflatus, ab omni etiam civili
functione depellitur. E vita migravit annò
regni quinquagesimò secundò, mundi ter mil-
lesimò ducentessimò septuagesimò septimò.
(3277.)

IX. Quam

*IX. Quam populi regendi viam inire Joatham
Ozia, & Achaz Joatham filius?*

Longè diversissimam; hinc quantum laudis sibi tum religionis studiò, tum bellicæ fortitudinis gloriâ sedecim, quibus regnabat, annis comparaverat Joatham parens, tantum infamiæ & dedecoris contraxit Achaz, degener omnino filius, juratúsque & Numinis & avitæ religionis hostis, ac idolorum cultui ad extremam usque insaniam & impietatem deditus. Quapropter maximis eum cladibús attrivére Idumæi, Philisthæi, Reges itè Israël, Syriæ, & Assyriorum. Nec sic tamen resipuit demens, sed deterior in dies factus, annò regni sextò & decimò, mundi 3308. vitam sceleratissimè actam cum æterna morte commutavit, indignus Regum sepulchrís & omni posterorum memoriâ.

§. 2.

Octo Reges Juda ab Ezechia usque ad captivitatem Babyloniam.

I. Quis Achazo successit?

Ezechias, pessimi parentis optimus filius, qui nihil antiquiùs habuit, quàm ut religionem, patris impietate propè collapsam, in integrum restitueret, oblitteratis undique nefariæ superstitionis vestigiis. Quapropter maximis & prodigiosis à DEO favoribus est cumulatus; quod tunc maximè patuit, quando DEI jussu Angelus centum & octoginta quin-

que

que millia militum, quos Sennacherib Assyriorum Rex Hierosolymis admoverat, una nocte interfecit. Ezechias porro vitam, ingenti miraculò quò revocatus cum horologiù sciattherici umbra solis cursus, ad quindecim annos prorogatam, laudabilissimè finiit annò regni vigesimò nonò, mundi 3337. Aliquot antè annis, quàm Ezechias regnum capessivit, urbs Roma à Romulo ædificari cœpta est annò mundi 3301. Alii 3300. alii 3302. aut seriùs conditam ajunt.

II. Quam sibi laudem Manasses, ejusque filius Amon regnando peperere.

Duodecim annorum puer erat Manasses, quando ad regni gubernacula, quæ quinquaginta quinque annos ipsos tenuit, est admotus, ac primò statim annò pessimis aulicorum artibus ità depravatus est infelix puer, ut nullum propè facinus inausum, intentatùmque relinqueret. Verùm ubi ab Assyriorum Regis Ducibus captus, & cum flore nobilitatis Judaicæ Babylonem est abductus, divino inter custodiæ tenebras oborto lumine, scelerum suorum immanitatem jam tandem agnoscere, detestari, & amarissimè deflere lacrymè cœpit. Nec multò post libertati ac regno restitutus, qui populum priùs pravò suò exemplò ad impia sacra pellexerat, jam totus à se diversus, eundem ad pietatem & avitæ religionis cultum reduxit. Sub hæc tempora Hebræa illa Amazon Judith, formæ

mæ & virtutis miraculum, de Holoferne Assyriorum Duce triumphavit, quem facto supra sexum generosô virago fortissima suomet in tentorio obtruncavit, atque unico hoc ictu hosti præpotenti, ac præferoci nervos omnes incidit. Manassi successit Amon filius, & ipse impiis procerum quorundam technis ad immania scelera inductus, vivo etiamnum parente, quem secutus dehinc est peccantem, non itêm pœnitentem. Itaque annô regni secundo ab ipsismet domesticis est interemptus, ut eos haberet scelerum suorum ultores, qui ad peccandum fuerant concitatores.

III. Num Josias quoque impii parentis vestigiis institit?

Minimè omnium; quin potius ad eximiam pietatem jam indè è teneris informatus, veri Numinis cultum, à parente profligatum, instaurandum ubique, & propagandum suscepit, abolitâ omni penitus simulacrorum, rituumque sacrilegorum memoriâ. Obiit tandem ex vulnere Princeps religiosissimus annô regni trigesimô primô, mundi 2325. in expeditione contra Nechaonem Egypti Regem, inconsultô DEO, suscepta, longiore vita dignissimus, nisi populus impius Rege tam pio indignum se pridem reddidisset.

IV. Quæ tandem quatuor ultimorum Regum, Joachazi, Joakimi, Jechonie, & Sedecia fuit fortuna?

Joachaz, degener Josiæ filius, post trimēstre imperium à Nechaone Egypti Rege so-

liò dejectus, fratri Eliacimo, seu Joakimo, regnum cedere cogitur. Joakimus porro scelera sceleribus cumulando impendentem dudum regno Judaico procellam in suum, suorumque caput celerius concitavit. Igitur Nabuchodonosor, obsessâ, captâque Hierosolymâ, Regem catenis vinctum Babylonem abducit, pauloque post in regnum restituit, imperatô prægrandi tributô, quod cum triennio ægrè solvisset, quartô post annô rebellare cœpit. Denuò igitur à Chaldæis captus, occisusque, ac extra urbis mœnia est projectus, feris & voluctibus in prædam cessurus. Annô regni undecimô, mundi 3436.

Joakimo successit filius Joachinus, sive Je-chonias, paternæ impietatis hæres, qui tertio post mense, quàm Hierosolymis regnare cœperat, cum Matre, uxore, & regni primoribus, omnique gazâ Babylonem est abreptus.

In hujus locum Matthanas, sive Sedecias, patruus est successus, qui impletâ tandem scelerum mensurâ, sibi regnôque toti ultimum accersivit exitium. Capta igitur à Chaldæis post durissimam obsidionem est Hierosolyma, & unâ cum Templo illo augustissimo incensa, ac funditus everâ; retractus è fuga Sedecias; ejus liberi in parentis conspectu trucidati; Rex ipse oculis orbatus, injectisque catenis, annô regni undecimô cum ingenti, nobiliorum præsertim, caterva; Babylonem est perductus, ubi in vinculis aliquantô post squalore & mœrore confectus contabuit. Atque

itâ regnum hoc nobilissimum, perinde atque antea Israëliticum, tot scelerum gravissimorum pondere concussum identidem & labefactatum, tandem omninò concidit annò mundi ter millesimò quadringentesimò quadagesimò sextò. (3446.) Post 70. annorum servitutem Judæis in sedes quidem suas remigrare licuit; semper tamen alienis deinceps dominis subjecti, nec unquam sui amplius juris, & mancipii fuerunt.

Observationes ad V. Historiæ Biblicæ Partem.

I. *Quis terra illius à DEO promissa à primis regni exordiis status erat & conditio?*

Regnante Davide, imò & Salomone, antequam suis hic cupiditatibus regendum se tradidit, regio illa totius orbis fortunatissima dici haud injuriâ poterat; at ubi regnum, impetrantium præcipuè vitiò, in Judaicum & Israëliticum discissum est, hoc idololatria corripit penitus atque pessumdedit: illi contrà tamdiu sua stetit incolumitas, quoad Rex cum populo supremi illius Domini imperio se submittebat.

II. *Quinam Prophetae illis maximè temporibus floruerunt?*

Elias, Elisæus, Isaias, Jeremias, Ezechiel, Oseas, Joël, Amos, Micheas, Sophonias, &c. qui magna virtutis æmulatione, & ardenti

religionis fervore incensi, in Regum æquæ ac populi flagitia gravissimè invehebantur.

III. Cur DEUS illa tempestate tot Prophetas misit?

Id nimirum summopere exigebat & hominum, & temporum illorum iniquitas; quam pauci admodum numerabantur, qui aut eorum prædictionibus haberent fidem, aut monitis saluberrimis morem gererent.

IV. Quæ potissimum causa fuerat scissi primùm, tum collapsi penitus regni Iudaici ac Judaici?

Exaggerata criminum gravissimorum moles, quæ uti priscis illis temporibus, ita hodièque urbes, regiones, ac regna florentissima pestumdare, funditusque evertere consuevit.

V. Quis rerum in orbe reliquo cursus tunc erat?

Regnum Assyriorum, Nabuchodonosore imperante, summum gloriæ & potentiæ verticem attigerat. Græcia novis in dies incrementis angebatur, ac fermè è diversis Rebus publicis, regnisque minoribus constabat. Roma tenuibus, ut fit, initiis recens nata, sensim adolefcebat ad totius mundi imperium. Cæterum orbis propè universus veræ fidei lucem perosus, in densa errorum ac superstitionum caligine oberrabat.

P A R S VI.

De captivitate Babylonica, & quæ
exinde ad Hierosolymæ usque ex-
cidium sunt consecuta.

Quæ 4. sequentibus capitibus comprehen-
duntur, cum totidem mundi Monarchiis quo-
dammodo congruunt; nam 1. captivitas Ba-
bylonica in ultima Monarchiæ Assyriæ tem-
pora incidit. 2. Ducenti & octo, qui à ca-
ptivitate Babylonica fluxerunt anni, cum Per-
sica. 3. Tria, quæ proximè sequuntur, sæ-
culi, cum Græca. 4. Qui supersunt anni 29.
ante, & 70. post Christum natum, cum Ro-
mana concurrunt Monarchia.

C A P U T I.

De 70. annorum captivitate Judæo-
rum sub Monarchis Assyriis.

*I. Quid captivitatis illius tempore singulari
dignum memoria occurrit?*

Daniel Prophetes ob admirabilem arcano-
rum cœlestium cognitionem, & reconditam
sapientiam summa apud Reges illos pollebat
auctoritate & gratiâ. Hic tenera etiamnum
ætate in captivitatem Babyloniam fuit ab-
ductus, ubi variis utriusque fortunæ casibus
jactatus, firmus semper & immobilis perstitit,
ac nè transversum quidem unguem à virtutis

tramite unquam discessit, sapientiæ, fortitudinis castimonix, & integritatis miraculum.

II. Cur Daniel à Nabuchodonosore tot tantisque honoribus est cumulatus?

Regi per quietem objectum erat somnium, ejus, ubi evigilavit, ita est oblitus, ut se tamen somniasse meminisset. Igitur ex hario-
lis tam somnium ipsum, quàm ejusdem interpretationem exquirat. Cum ad postulatum tam insolens omnibus hæreret aqua, Daniel, de re tota divinitus edoctus, somni totius seriem Regi enarrat, oblatam videlicet quiescenti fuisse statuam prægrandem, cujus caput aureum, brachia & pectus argentea, venter & femora ærea, tibiæ ferreæ cum pedum digitis partim ferreis, partim fictilibus, in quos incidens lapis, de monte sinè hominum manibus avulsus, statuam totam contriverit penitus & cōminuerit, indeque in montem excreverit tam vastum, ut orbem impleret universum. Et capite quidem aureo Assyrio-Babylonicum, pectore argenteo Persicum, ventre æreo Græcum, ac pedibus quæ ferreis, quæ fictilibus Romanum portendi imperium, hisque omnibus successurum regnum aliud longè augustius, stabiliusque, utpote in omne ævum duraturum, prioribus singulis in nihilum tandem abituris. Hac somni mystici interpretatione Rex totus attonitus, Daniele, tanquam Deorum aliquem, prono in terram vultu veneratur. Cumque is honores hos non sibi,

sibi, sed DEO soli deberi asseverasset, Rex præmiis amplissimis cumulatum, cunctis Babylonice Provinciis præfecit.

III. Quid de tribus Danielis sociis Anania, Azaria, Misæle, sive Sidrach, Misach, & Abdenago, divina tradunt Littera?

Hi nulla adduci ratione poterant, ut auream Nabuchodonosoris statuam adorarent. Igitur tyranni jussu in fornacem, septuplò vehementius atque aliàs consueverat, succensam, ligatis pedibus, conjiciuntur; unde tamen incolumes prorsus, ac, nè capillo quidem adusto, sunt egressi. 3456.

IV. Quam Daniel poenam superbo Nabuchodonosori subeundam prædixit?

Futurum, ut, qui divinos adeò honores affectare ausus esset, infra homines abjectus, per agros, sylvasq; pecudum more vegetetur, ac annis septem fœnò bovis instar vescatur. Quam prædictionem mox rei veritas comprobavit. 3464.

V. Qua occasione Regi Balthasari imperii Babylonici interitum denuntiavit Daniel?

Dum is splendidissimò de nocte convivio assidens, sacras etiam pateras è Templo Soly-mæo ablatas, mensæ interri, atque in honorem Deorum suorum exsiccari jubet, ecce tibi! manus ad parietem juxtà candelabrum, videntibus cunctis & cohorrentibus exarat: *Mane, Thecel, Phares.* Cùmque horum vim

ac sensum verborum nè conjecturâ quidem assequi ullus posset, Daniel protinus accersitus, Regi significat, DEUM numerâsse annos, quibus regnâset, operâque ejus omnia ad libram exegisse; quæ tamen justo caruissent pondere: itaque vitâ & regnô, in Medos ac Persas jam nunc dividendo, exturbatum iri. Id quod eadem illa nocte factum, quâ urbs Babylon capta ab hoste, cædibûs, rapinâs, incendiis vastata; REXQUE ipse temulentus cum suis trucidatus.

VI. Num Judæi captivitatis suæ tempore durius, asperiusque sunt habiti?

Quin potius leniter, clementerque fuisse acceptos, inde conjici posse videtur, quod eorundem tribules, nempe Daniel primus à Rege Nabuchodonosore, Ananias verò, Azarias, & Misael provinciarum præsides & supremi tribunalium præfecti fuerint constituti, atque adeò non auctoritatem modò summam, sed imperium quoque, servi licet & captivi, in suosmet dominos, mirabili DEI dispositione, obtinuerint.

C A P U T II.

Judæorum res gestæ sub Monarchis Persicis.

I. Qua ratione Judæi è diuturna suâ captivitate sunt exempti?

Cùm Cyrus, primus Persarum Monarcha, totò Babyloniorum imperiò in ditionem suam red-

redactò, ex Judæis intellexisset, in sacris eorum Voluminibus multò antè & suam de Babyloniiis victoriam, & populi Judaici manumissionem prædictam fuisse, publico diplomate potestatem fecit omnibus in patriam remigrandi, Templique instaurandi redditis, quæ indè direpta erant, Vasis sacris. Igitur annò 3516. quadraginta & amplius Judæorum millia Hierosolymani, Zorobabele ductore, sunt reversi.

II. Penes quos Judæorum erat regimen post eorundem in patriam reditum?


Imperium summum penes Reges Persarum erat, è quorum arbitrio, consensuque Pontifices, Duces, & Magistratus suis è tribulibus deligere iis permissum erat.

III. Quo tempore urbis Hierosolymitanæ mœnia readificari coepit?

Imperante Artaxerxe, quintò Persarum Monarchâ, à quo Nehemias, Judæorum Dux, apud Regem gratus, hanc tandem facultatem impetraverat.

IV. Quinam Judæorum Duces fuere sub Monarchis Persicis?

1. Zorobabel. 2. Joacim. 3. Eliasib. 4. Esdras. 5. Nehemias. 6. Jojadas. 7. Jonathan, è quibus duo postremi cum suis successoribus Duces simul ac Sacerdotes fuerant.



CAPUT III.

Judæorum res gestæ sub Monarchis Græcis.

Memorandus hic 1. Status Judææ sub Alexandro Magno. 2. Sub Regibus Ægyptiis. 3. Sub Monarchis Syricis. 4. Sub Sacerdotibus, regium sibi titulum vindicantibus.

§. I.

Judææ status tempore Alexandri Magni.

I. Quem in finem Alexander cum exercitu suo Hierosolymam contendit?

Statuerat omnino urbem hanc vi capere Alexander, quòd Tyrum obsidenti annonam Judæi mittere recusassent. Verùm ad conspectum Jaddi, cum Levitis sacerdotali habitu obviam facti, totus repente immutatus, placatusque est.

II. Quid Alexander Hierosolymis egit?

Templum ingressus, supremo Numini ex summi Sacerdotis præscripto sacrificasse perhibetur. Ajunt quoque, ostensum ei Danielis librum, in quo Græcum quendam Persas debellaturum vates præagierat. Quam ille prædictionem de se ipse interpretatus est.

III. Quenam Judæis ab Alexandri obitu evenère?

Calamitates, ærumnæque non leves cum Regum Ægyptiorum, tum Syrorum, Judææ tunc dominantium, tyrannide perpetiendæ ipsis erant.

§ 2.

§ 2.

**Judæorum varia fortuna sub Regibus
Ægyptiis.**

*I. Quis Alexandrô demortuô in imperio suc-
cessit ?*

Monarchia hæc in regna complura distra-
cta mox fuit, quæ Ducum præcipui inter se
se partiebantur. Ex his Macedonicum, Ægy-
ptium, & Syrium præ cæteris eminebant.

*II. Quenam Onia & Simeonis Pontificum
temporibus gesta sunt ?*

Ptolomæus Lagi filius, Syriâ, Phœniciâ &
Judæâ, cum urbe Hierosolyma sub imperium
suum redactis, ampliùs centena Judæorum
millia in Ægyptum abduxit, è quibus trigin-
ta circiter bellatorum millia in urbium mu-
nitiorum præfidiis collocavit; imbellem ve-
rò turbam senum, mulierum, adolescentium,
militibus in servitutem tradidit.

*III. Num melioribûs auspiciis Eleazarus
Pontificatum gessit ?*

Omnino; nam Ptolemæus Philadelphus,
qui Lagidi parenti successerat, gentis Hebrææ
perstudiosus, multo eam favore complecteba-
tur. Hic conquestis undique librîs Biblio-
thecam longè celeberrimam Alexandriæ in-
struxit, quam ut Hebraicis quoque volumi-
nibus ornaret, ab Eleazaro Pontifice mitti ad
se petiit viros apprime peritos, qui sacros il-
los Codices è lingua Hebraica in Græcam
transferrent. Is duos & septuaginta Græcè
simul

simul ac Hebraicè doctos, nec virtute minùs, quàm eruditione præstantes è senioribus delegit, qui, licèt ex Auctorum gravissimorum sententia separatis quisque cellulis inclusi essent, opus tamen hoc totum mirabili non sententiarum modò, sed verborum quoquè consensione ità absolverunt, ut singulorum exempla nè vocolâ quidem inter sese discreparent. Quapropter Rex admiratione & gaudio plenus non solùm Interpretes singulos muneribûs amplissimîs ornatos à se dimisit, sed vasa insuper plurima ex auro argentoque ad sacros Templi usus liberali manu adjecit, omnibûs, quos parens ex Judæis captivos detinuerat, libertate donatis.

IV. Quinam, Eleazarò vitâ & Pontificatu functò, sacris præfuere.

Manasses, Eleazari patruus, hocque è vivis sublato, Onias secundus, qui sub Ptolemæo Philadelpho, & Evergete, Ægypti Regibus ætatem degebant tranquillam, & pacatam.

V. Nam æquè pacatus fuit Simonis alterius Pontificatûs?

Huic multùm negotii facefferat Ptolemæus Philipator, Evergetæ filius, qui dum Hierosolymam delatus, non Templum modò, sed ipsa quoquè adyta, Simeone Sacerdote frustra dehortante, subire tentat, membrîs repentè omnibûs dissolutis, divinitùs inhihetur. Nec tamen, ubi se collegit, à proposito destitit; sed in Ægyptum cum atrocibus in Judæos minis profectus, ad Ægyptios ritus indignissimis

mo-

modis quàm plurimos compulit; eos verò, qui in religione firmi perstabant, elephantibus conculcandos objecit, cui spectaculo Rex ipse semel, iterum ac tertio interesse statuerat; sed primum sopore divinitus immisso, tum mentis alienatione, ac tandem geniorum cœlestium, qui minaci vultu spectabiles se præbuerant, interventu ab impio proposito abstinere cogebatur. Quapropter Judæos vinculis solvi, ac suam quemque domum repetere jubet.

§. 3.

Status Judæorum sub Regibus Syriæ.

I. *Quid Onia III. Pontifice actum?*

Cum Seleucus Philopator, Rex Syriæ, ex perfido transfuga intellexisset, ingentes opes ac thesauros in Templo Solymæo reconditos esse, Heliodorum, unum è proceribus suis Hierosolymam misit, qui eas pecunias in regium ærarium transportaret. Ac licet Onias direptori sacrilego pro virili se opposuerit; actum tamen egisset, nisi eques cœlestis cum binis peditibus, à DEO submissis, Heliodorum flagris tam atrociter excepissent, ut is vitam servatam in lucro ponens, re infectâ abire sit coactus. Onias porro fraude atque invidiâ Jâsonis, fratris sui, sacerdotio primum dejectus, ac tandem Menelai, qui in Pontificatum se intruserat, perfidiâ morte indignissima est sublatus. Indè Ecclesia Judaica legitimis Sacerdotibus sexennium orbata erat, donec scilicet Machabæi ritè succederent.

II. *Quô animô Antiochus Epiphanes in Judæos fuerat?*

Iniquissimô; hinc cùm Judæi Duce destituti essent, horum provincias magno cum exercitu invasit, irritatus maximè, quòd ejusdem mortem, uti mendax fama sparserat, non luctu, sed publicis gaudiis fuissent persecuti. Expilatâ ergo Hierosolymâ, amplius ducenta Hebræorum millia mactari jussit, haud multo paucioribus publico in foro pecorum more venum expositis. Atque hæc præludia erant illius immanitatis, quâ bienniô exacto, in Judæos defævit, quorum urbe primariâ rursus direptâ & igne ferrôque vastata, sub mortis pœna vetuit, nè quisquam Legem Mosaicam profiteretur. Demum Jovis execrandi simulacrum in ipso Templo adorandum proposuit, eique porcinas carnes immolari, atque ab Judæis absumi præcepit.

III. *Quinam ex Judæis illustriora fortitudinis specimina hoc tempore edidère?*

Primus erat Eleazarus, senio venerandus, qui pro avita religione mori maluit, quàm iniquissimo Regis mandato in gustanda fuilla morem gerere. 2. Septem fratres Machabæi unâ cum Matre, qui omnes, nè supremi Numinis offensam incurrerent, extrema quæque perpeti decrevêre. Quam animi constantiam exquisitissimis tormentis excarnificati, luere coacti sunt, Matre spectante, filiosque ad luctam tam generosam cohortante, quibus demum & ipsa funus extremum accessit.

fit. 3. Mathathias Machabæus cum viginti quinque suorum millibus tyranno sese ausus opponere, in fortitudinis theatrum prodiit, nullis minis expugnabilis, Dux simul ac Sacerdos. 3888.

IV. Quis, Juda Machabæo Duce, armorum successus fuit?

Longè optimus; nam is ingentes Antiochi copias profligavit, non tam armis, quàm cœlestibus suppetiis, quas jejuniis ac precibus impetrabat, confusus. Antiochus, qui tunc bellò Persicò distinebatur, cognita suorum clade in furorem actus, consilium à celeritate capit, ratus hâc unâ negotium confici, ipsâque Hierosolymam everti posse, si quàm ocysimè rebus suis afflictis præsens ipse succurreret. Verùm in itinere viscerum dolore ingenti correptus, furere simul ac vivere desit. Judas, Nicanore quoquè Antiochi Eupatoris Duce devicto, editoque non uno bellicæ fortitudinis specimine, tandem in pugna pertinacissima contra Bacchidem, Demetrii Regis Legatum, vulneribus, mortique non hosti succubuit.

V. Quid Jonathas Jude Machabæi frater præclari gessit?

Ductoris ille Hebræi simul, ac sacerdotis dignitate præfulgens, Bacchidem debellat, multis insuper palmis ac trophæis inclytus. Tandem perfidiâ Tryphonis, Syrii satrapæ, cujus promissis plùs nimio fidebat occubuit.

VI. *Culnam, Jonathâ sublatâ, Sacerdotis
supremi dignitas delata est?*

Simoni, Jonathæ ac Judæ fratri. Is præliis aliquot adversus Tryphonem prosperè gestis, ac Ptolemæo genero, qui sacerdotali dignitati inhiabat, ipsas inter epulas trucidatus est.

VII. *Quis Simonem secutus?*

Tertius ejusdem filius Joannes à domita Hyrcania Hyrcanus appellatus. Huic satis quieto esse licuit, quòd finitimi Rēges Syriæ, atque Ægypti, duo antehac Judæorum flagella, aliis essent curis, armisque distracti. Vir cū esset clarissimus, æternam tamen contaminatæ religionis maculam Machabæorum familiæ asperxit, professus sectam Saducæorum, qui Angelos, reliquosque Spiritus, uti & animarum ad vitam reditum anilibus fabulis annumerant.

S. 4.

De Statu Judææ sub Pontificibus, regium
sibi titulum vindicantibus.

I. *Quis primus summus Pontifex simul,
ac Rex Judææ exstitit?*

Aristobolus, Hyrcani filius, Regis nomen & insignia primus post Sedeciam sumpsit. Hoc ut stabiliret, & Matrem & Antigonum fratrem interemit, reliquis fratribus arcto carceri inclusis. Unò haud ampliùs annò Judææ præfuit, sanguinis copiâ suffocatus eo in loco, ubi prius manus crudeles fraterno cruore conspurcavit. 3950.

II. *Cui*

II. Cui reliquit Aristobulus regale Sacerdotium?

Alexandro Jannæo. Fratris furorem hic unus evaserat, ipsemet tigride immanior: nam postquam sexennii spatium quinquaginta Judæorum millia mactavit, octingentos insuper Judæorum procures, qui ejus tyrannidem improbabant, jussit in furcas agi, & in illorum, adhuc spirantium, conspectu, uxores ac liberos jugulari. Tandem, fatigata per viginti quatuor annos tyrannide, vino & sanguine ebrius, morbum contrahit, atque animam scelestam circo transmittit. 3975.

III. Quis tyranno huic successit?

Salome Jannæi conjux, quæ, post nonum gubernationis annum, filium natu majorem, Hyrcanum secundum, quem jam antè Pontificatum præfecerat, Regem constituit.

IV. Qualis fuit Hyrcani gubernatio?

Varia & inconstans: cum enim regni negotia remissius curaret, Aristobulus frater illum armis victum regno exiit. Verum Pompejus, Romani exercitus Dux, caprâ Hierosolymâ, Hyrcano Pontificatum cum regno restituit, Aristobulo cum filiis Romam abducto.

V. Quid Pompejus memoratu dignum gessit in Templo Solymæo?

Postquam illud vi expugnavit, duodecim quidem Judæorum millia interemit, ex eo tamen nihil abstulit, imò nec Sacerdotes, sacris intentos, ob Templi reverentiam turbari permisit.

VI. Quis Machabæorum ultimus regnavit?

Antigonus, Aristobuli filius, Romano è carcere elapsus, ob arrogatum sibi Regis titulum, à Senatu artibus Herodis, hostis rei-publicæ declaratur, ac in publico foro Antiochiæ, securi percutitur, Machabæorum è gente, & ex Tribu Juda Rex ultimus, atque infelicissimus. 4014.

C A P U T IV.

De Rebus Judaicis sub Romanis Imperatoribus.

I. Quando Judæa in potestatem Romanorum venit?

A tempore Judæ Machabæi Romanis fœdere quidem juncti erant Judæi, non tamen subiecti. At ubi Hyrcanus, à fratre regno privatus, ope Pompeji illud precario recepit, Judæa suam amisit libertatem, Romanis supremum in Judeos dominatum nunquam amplius dimittentibus. Itaque Judæa idem, quod aliæ hæcenus Provinciæ, experta est, Romanos, ex armorum sociis, demum fieri populorum dominos.

II. Quis, extinctis Machabæis, Judæam rexit?

Herodes, Magnus dictus, flagitiis maximus. Hic tamen non erat de gente Judæorum, suis tamen assentationibus, & immensa octingentorum talentorum profusione ab Augusto regnum obtinuit. 4017.

III. An

*III. An Herodes, ejusque successores supremi
erant Judææ Domini?*

Neutiquam : secus enim Judæa in censum non venisset, cum Augustus orbem universum describi jussit. Patebat ergo Herodes Romanis, ut adeo Regis appellatio multum splendoris, potentia parum haberet.

*IV. Quò regnante Servator mundi in lucem
fuit editus?*

Herodes Judææ tunc imperabat; qui, cum, ex tribus Magis, cognovisset, novum Judæorum Regem natum esse, sceptro suo metuens, omnes, circa urbis Bethlehemiticæ confinia, parvulos, biennium nondum egressos, cædæ inaudita jugulari præcepit. Quò auditò Augustus dixisse fertur, malle se Herodis porcum, quàm filium esse: à porcorum enim cæde & sanguine Herodes, utpote Profelytus, religionis prætextu abstinebat, non itè à cæde hominum.

*V. Quenam alia Herodiana crudelitatis
monumenta extant?*

1. Mariamnem conjugem, Principum Matronarum decus. 2. Alexandram socrum cum ejus filio. 3. Aristobulum, Alexandrum, & Antipatrum filios suos. 4. Judæorum primates obtruncari jussit, additò etiam, cum de vita conservanda desperaret, crudeli imperiò, ut omnis Judæorum nobilitas, minacibus editis in urbem Jerichuntinam convocata, circumque Amphitheatrali inclusâ statim, ab obi-

tu suo contrucidaretur, nè videlicet sine publico, saltèm ob aliorum cladem, luctu efficeretur.

VI. Quas penas Herodes etiamnum in hac vita dedit?

Postquam cum innumeris, gravissimisque infirmitatibus diu est conflictatus, tandem morbo pediculari, inter intolerabiles putrescentis totius corporis fœtores miserandum in modum absumptum est hoc generis humani, omniumque flagitiorum monstrum.

VII. Quinam ex Herodis stirpe Judeam gubernârunt?

Tres Herodis filii Archelaus, Philippus, & Herodes Antipas, qui ultimus Joannem Baptistam, incestas nuptias exprobrantem, obtruncavit, Servatorem verò nostrum, cum nullum ab eo, uti speraverat, impetraret prodigium, instar emotæ mentis hominum ludibrio habuit.

VIII. Quò tempore Servator noster cruci est affixus?

Annò à nativitate sua trigesimò quartò, Tiberiò imperante, & Pontiò Pilatò Judææ præfectò.

IX. Quid acta Apostolorum memorant de Herode Agrippa?

Fuit is Herodis Magni nepos, juratus Christianorum hostis. Jacobum, cognomine Majorem, Jerosolymis capite minuit. idem supplicium irrogaturus Petro, nisi Christus per

Angelum effractis vinculis illum eduxisset è carcere. Porro hic Herodes eò dementiæ venerat; ut Cæsareæ in ludis publicis majorem homine mortali in sui venerationem expetierit, Deum se ab infana plebe adorari passus. Verùm hunc scœnicum Deum vindices à DEO immissi vermes non diu post inter incredibiles dolores devorârunt.

X. Quis Regum Judææ postremus fuit?

Agrippa Herodis Agrippæ filius, quem Judæi, excitato contra Romanos tumultu, primò Jerosolymâ, mox toto regno expulerant. Sic regnum Judaicum penitus extinctum, & translatum est ad Romanos, Jerosolymam, & omnem Judæorum gentem non multò post excisuros.

XI. Quomodo impletum vaticinium Jacobi Patriarchæ de sceptro à Domo Judæ non auferendo usque ad Messie adventum?

In Antigono, qui ultimus ex Tribu Juda Rex erat, extincta est dignitas regia, atque translata ad gentem exteram in Herode, quo imperante Christus JESUS, tot votis à Judæis expetitus, humanam carnem induit.

Observationes ad sextam Partem Historiæ Biblicæ.

*I. Quisnam sexta illa mundi ætate status erat
Reipublicæ Judaicæ?*

Regimen Politicum à tempore captivitatis
Babylonicæ plurimùm de splendore pristinæ

dignitatis amisit ; cum exinde Judæi nunquam ampliùs sui Juris, sed primò Assyrio-Babyloniorum, deinde Persarum, tum Græcorum, ac demum Romanorum aut servi, aut stipendiarii fuerint. Toto tamen tempore illo, quò sub idololatrarum potestate erant, ab idolorum cultu alieniores fuerunt, sive quòd Sacerdotes Rempublicam tunc administrabant, sive quòd diuturna illa 70. annorum vexatio, & præcisa deinceps libertas ad saniora eos compulère.

II. Quis reliquo in orbe rerum cursus erat?

Respublica profana aliam atque aliam faciem identidem induebat, DEO, propter imperantium maximè flagitia, regna atque imperia à gente in gentem transferente. Sic Monarchia Assyriorum post Sardanapali interitum divisa est in Regnum Medorum, & post annos ferè centum in imperium Assyrio-Babylonicum, donec sublato Balthasare tota hæc Monarchia translata est ad Persas ab his post annos ducentos & octo ad Græcos, à Græcis post terna sæcula tandem ad Romanos. Ex omnibus porrò his regnis amplissimis & potentissimis cultus veri Numinis exulabat, idololatriâ ubique dominante.

III. Quinam Propheta id temporis in Judæa floruerunt?

Post captivitatem Babyloniam Aggæus & Zacharias, & post hos Malachias vaticinatus est, à cujus obitu publica Prophetarum oracula

cula siluere per annos propè quingentos, quoad Patris æterni Verbum & Prophetarum Dominus hunc in mundum ipse adventaverat.

IV. Qui, qualésque Machabæi fuere?

Hi ex illustri Judæorum prosapia oriundi, sacram simul ac profanam Rempublicam, à Mathathia ad Herodianos usque, moderabantur.



APPENDIX

De excidio urbis Hierosolymæ.

I. Cur Argumentum hoc annectitur narrationibus Biblicis?

Quia ordo, seriésque historiæ exigít, ut, sicut populi à DEO electi fortunam utramque ab ipsis primordiis percensuimus, ità exitum quoque memoremus, qui quàm luctuosus fuerit, indè patet, quod ipsi DEI Filio lacrymas expresserit.

II. Quenam tragici hujus excidii causa erat?

Non tam rebellio contra Romanos, quàm mors ipsi Auctori vitæ, Christo illata. Hinc Christi cultores, nè eâdem cum Judæis ruinâ involverentur, divino oraculo moniti, in tutiora se tempestivè receperunt, futuri spectatores & testes scenæ luctuosissimæ, quam Divina Nemesis adornavit, ad Divinitatem Christi, tum ex horrendis Judæorum suppliciis,

tum ex Divinis oraculis , ad literam completis , comprobendam.

III. Cur per Romanos urbs exscindenda fuerat?

Quia Iudæi repudiato vero suo Rege ac Messia, Regem se alium nisi Cæsarem habere uno omnes ore conclamârunt, atque hac demum ratione Præsidentem Romanum ad Christum, quem is insentem palàm pronuntiaverat, occidendum perpulerunt. Plectendi igitur erant per Cæsarem, quem Regi ac Messia suo impiè prætulerant. Nè verò Iudæi urbis suæ excidium adscriberent Romanorum furori, DEUS iustitiæ suæ instrumentò usus est Titò, mitissimi ingenii Principe, qui, post honestissimas, quas non semel obtulit, urbis dendæ conditiones rejectas, coram toto exercitu contestatus est, se invitum compelli ad urbem ac Templum, contrà ac statuerat, everrendum.

IV. Cur pena hæc Judeis non illico post Christi mortem fuit inflicta?

Quia Nemesis divina lento plerumque passu graditur, & diu antè, quàm feriat, minatur. Hinc ut spatium respiscendi suppetere, ostenta quadam, tanquam futuræ cladis præludia antecelsere.

V. Quenam illa?

1. Cometes horrificus annò totò, fulgurantis instar gladii, urbi impendens. 2. Lux ingens, solari similis, circa templum dimidiæ horæ spatio noctu. effulgens. 3. Porta Templi

pli ærea, vix à viginti viris claudenda, nocte concubia ultrò patefacta. 4. Conspecti in aëre currus ignei, & infestæ præliantium acies. 5. Audita in Templo vox horribilis Angelorum clamantium: *Migremus hinc!* 6. Vir è plebe, cui JESU nomen, per annos septem urbem circumcurans, & diu noctuque ingeminans: *Vae! vae Hierosolymis!*

VI. Quando, & à quo urbs oppugnata est?

Anno a Christi morte trigésimò septimò Titus, Romani Imperatoris Vespasiani filius, ipis feriis Paschalibus in summa hominum celebritate urbem repentinè obsedit, atque ut hæc DEI cæde contaminata civitas vinceretur sæpius, funditusque everteretur, post intermina bella, factiones cruentas, mutuas civium & Sacerdotum strages, ipsiusque Summi Pontificis cædem, post annonam, in plures annos suffecturam, fortuito incendio absumptam, ortamque indè famem, & ex hac pestilentiam atrocissimam, quartò obsidionis mense capta primò est urbs inferior, binisque post diebus Templum, contra Titi edictum, igne nullâ vel Imperatoris diligentia, vel ope humana sopiendo conflagravit, ac tandem urbs superior occupata est, omnibus, quæ illuc tanquam in locum tutissimum comportabantur, ferrò flammâque abolitis.

VII. Quid in tristi hac urbis excisione precipua consideratione dignum?

Pœna talionis, quâ Nemæis Divina in Judæos Deicidas animadvertit. Nam i. in

Oliveti monte initium olim datum erat sacrilegæ illi tyrannidi, quæ Christus latronis instar à militum cohorte fuit comprehensus, eodèmq; in loco urbs coronâ cingi cœpta.

2. Christus ipsiis feriis Paschatis ab innumeraibili multitudine ad diei festi celebritatem Hierosolymas convolante, circumfessus, probrorum, contumeliarum, cruciatuum, & tormentorum acerbissimorum scopus fuit, iisdemque feriis, quibus vicies centena & septingenta millia in urbem, velut omnis jam periculi securam, confluxerant, hæc arcta undique obsidione pressa & coangustata fuit.

3. Christus venditus est 30 argenteis: unicò dein denariò venditi 30. Judæi, è quibus 30. millia hoc pretiò veniére.

4. Christus à Judæis captus est: capti quoque sunt nonagies septies mille Judæi.

5. Christus arctæ custodiæ est inclusus: Judæi, nè quis elabi posset, novò murò totam urbem ambiente, quasi indagine, ferarum instar, fuère conclusi.

6. Christus ardentissima siti excruciatu, acetò potabatur & felle: Judæi, rabida fame stimulante, eò adigebantur, ut calceamenta, cingula, scutorum coria, finum & fœdissima quæque, imò & humanas carnes avidissimè vorarent.

7. Christus omnibus ludibrio & despectui fuit: perfida Judæorum gens adeò contempta, ubique & conculcata jacet, ut probrosius propè sit, esse Judæum, quàm furem, latronem, hæreticum, aut gravissimis quibusque flagitiis notatum.

8. Christus fuit
cruci

cruci affixus: horum ampliùs quingenti quotidie in crucem sunt acti, ut jam spatium deesset crucibus, & corporibus cruces. 9. Christus tandem à Judæis est occisus: Judæorum in illa obsidione undecies centena millia interiisse dicuntur.

VIII. Qua Judæorum post Urbis everisionem fuit fortuna?

Secuta est servitus secundùm Danielis vaticinium nunquam desitura. Unde exuti Templò, sacrificiis, urbibus, fundis, & prædiis, errabundi, extorres, sinè lege; sinè Rege toto vagantur orbe, perpetuo notati stigmate, repulsi à Magistratibus, aliisque publicis officiis & dignitatibus, veluti orbis totius purgamenta & carcinomata.

IX. Nunquàmne Templum instaurare sunt aggressi?

Tentârunt id semel atque iterum, sed maximò suò periculò & detrimentò; nam dum, imperante Hadriano, annò post Christum uatum centesimò trigessimò quartò, novas turbas concitarent, centum Judæorum millia occisione deleta sunt, reliquis penitus profligatis, perque orbem universum dispersis. Ad hæc cum circa annum Christi trecentessimum sexagesimum tertium, favente Juliano apostata, Templo instaurando manum admove-
rent, flammei globi è fundamentis erumpentes, instrumenta fabrilia absumpsêre, & rubræ cruces in operarum vestibus conspicuæ,

cœptis abſistere, crucisque trophæum circumferre vel invitos compulêre.

Atque hunc tandem exitum habuit Respublica Hebræorum, poſt tot viciffitudines populi, antea à DEO electi, tot contra hoſtes prodigiis ſervati, ſingulari Numinis tutela protecti, ac demum à DEO penitus reprobari, ſecundùm prædictionem Danielis cap. 9. *Et*

ciuitatem, & Sanctuarium diſſipabit populus cum

Duce venturo, & finis ejus vaſtitas &
poſt finem belli ſtatuta deſolatio.





Tabula Chronologica, seriem Patriarcharum, Judicum, Regum, & Pontificum complectens.

Prima mundi ætas ab Adamo ad diluvium

| Patriarchæ ante diluvium. | Ann. Nativ. | Vitæ. | Mortis. | Synchronismus Monarchiarum. |
|--|-------------|-------|---------|-----------------------------|
| Adam. - - | | 930 | 930 | |
| Seth. - - | 131 | 912 | 1042 | |
| Enos. - - | 236 | 905 | 1140 | |
| Cainan I. - | 326 | 910 | 1235 | |
| Malaleel. - | 390 | 895 | 1290 | |
| Jared. - - | 461 | 962 | 1422 | |
| Enoch. - - | 623 | | | |
| Methusalem. | 688 | 969 | 1656 | |
| Lamech. - | 875 | 777 | 1651 | |
| Noë. - - | 1037 | 950 | 2006 | |
| Sem, - - | 1559 | 600 | 2158 | |
| Cham, & Japhet, nati erant ante diluvium, sed tempus incertum est. | | | | |

Secunda Mundi ætas post diluvium
usque ad Abrahamum.

| Patriarchæ post diluvium. | Nativit. Anni | Vitæ. | Synchronismus Monarchiarum. |
|------------------------------|------------------|-------|---|
| Arphaxad. - | 1659 | 438 | Initium Mo- narchiæ Assy- riorum sub Nemrodo, an- nō ab orbe condito 1879. |
| Cainan 2. - | 1694 | 360 | |
| Sale. - - | 1724 | 413 | |
| Heber. - - | 1754 | 464 | |
| Phaleg. - - | 1788 | 239 | |
| Reu. - - | 1818 | 239 | |
| Sarug. - - | 1850 | 230 | |
| Nachor. - - | 1880 | 148 | |
| Thare. - - | 1909 | 205 | |

Tertia Mundi ætas ab Abrahami nati-
vitate usque ad Moysen.

| Patriarchæ reliqui usque ad Judices. | Anni Nativit. | Vitæ. | |
|---|------------------|-------|----------------------------------|
| Abraham - - | 2039 | 175 | Progressus Monarch. Assyr. |
| Isaac - - | 2139 | 180 | |
| Jacob - - | 2199 | 147 | |
| Joseph - - | 2289 | 110 | |
| Levi - - | 2285 | 137 | |
| Caath - - | 2318 | 133 | |
| Amram - - | 2381 | 137 | |
| Aaron - - | 2461 | 122 | |

Quarta Mundi ætas. Judices Hebræi.

| Judices Hebræi. | Nativ. Anni | Regim. | usque ad ann. | Synchronismus Monarchiarum. |
|--------------------|----------------|--------|------------------|-----------------------------------|
| Moyſes - | 2464 | 40 | 2584 | Progreſſus Monarchiæ Aſſyr. |
| Jofue - - | 2491 | 17 | 2600 | |
| Othoniel - | | 40 | 2640 | |
| Aod - - | | 80 | 2720 | |
| Debbora - | | 40 | 2760 | |
| Gedeon - | | 40 | 2800 | |
| Abimelech | | 3 | 2803 | |
| Thola - - | | 23 | 2826 | |
| Jair - - | | 21 | 2848 | |
| Jephte - | | 6 | 2854 | |
| Abefan - | | 7 | 2861 | |
| Ajalon - | | 10 | 2871 | |
| Abdon - | | 8 | 2879 | |
| Samſon - | | 20 | 2899 | |
| Heli - - | | 40 | 2939 | |
| Samuel - | | 22 | 2962 | |

Nè in texendo Regum Catalogo ſubſequenti, contra Orthographiæ regulas peccatum putes, monendus es, quòd quantitas Characterum designet qualitates ipſorum Regum; adeò, ut ille qui in principio, medio, vel fine naminis ſui, Characterẽ minori notatus eſt; in principio, medio, vel fine Regni ſui reprehendiſſibilis fuiſſe intelligatur, exceptâ tamen literâ initiali.

Quinta Mundi ætas. Reges Hebræi.

| Reges. | An. Reg. | ufque ad an. | Reges. | An. Reg. | ufque ad an. | Synch- ronif. |
|------------------------|-------------|-----------------|--------------------------|-------------|-----------------|-------------------------------|
| SAUL - - | 17 | 2979 | | | | Monar- chiar. |
| DAVID - - | 40 | 3019 | | | | |
| SALOMON | 40 | 3059 | | | | |
| <i>Reges Juda.</i> | | | <i>Reges Ifræël.</i> | | | <i>Pro- gres- sus</i> |
| ROBOAM - | 17 | 3076 | IEROBOAM | 21 | 3081 | MO- |
| ABIAS - - | 3 | 3079 | NADAB - | 1 | 3082 | nar- |
| ASA - - | 41 | 3120 | BAASA - - | 23 | 3105 | chia- |
| JOSAPHAT | 25 | 3145 | ELA - - | 1 | 3106 | rum |
| JORAM - | 4 | 3150 | ZAMRI - | | 3106 | Assy- |
| OCHOZIAS - | 1 | 3151 | AMRI - - | 11 | 3117 | rrior. |
| ATHALIA - - | 6 | 3157 | ACHAB - | 22 | 3138 | |
| JOAS - - | 39 | 3196 | OCHOZIAS | 1 | 3139 | |
| AMASIAS - | 29 | 3225 | JORAM - | 12 | 3151 | |
| OZIAS - | 52 | 3277 | JEHU - - | 28 | 3179 | |
| JOATHAM | 16 | 3293 | JOACHAZ - | 16 | 3195 | |
| ACHAZ - | 15 | 3308 | JOAS - - | 16 | 3211 | |
| EZECHIAS | 29 | 3338 | JEROBO. 2. | 41 | 3251 | Finis |
| MANASSES | 54 | 3392 | Interregn. | 11 | 3262 | Mo- |
| AMON - - | 2 | 3394 | ZACHARIAS | 6 M. | 3262 | narch. |
| JOSIAS - - | 31 | 3425 | SELLUM - | 1 M. | 3262 | Assyr. |
| JOACHAZ - - | 3 M. | 3425 | MANAHAM | 10 | 3274 | sub Ro |
| JOAKIM - - | 11 | 3436 | PHACEIAS | 2 | 3277 | ge Bal- |
| JECHONIAS - | 3 M. | 3437 | PHACEE - | 20 | 3297 | chafa- |
| SEDECIA - | 10 | 3446 | OSEAS - | 18 | 3314 | re. 3516. |

Sexta Mundi ætas. Pontifices Hebræi.

| Duces & Pontifices. | Anni Regim. | usque ad Ann | Synchronismus Monarcharum. |
|---------------------|-------------|--------------|---|
| <i>Captivitas</i> | | | |
| <i>Babylonica.</i> | | | |
| Zerobabel - | 70 | 3516 | Initium Monarchiæ Persicæ sub Cyro, 3516. |
| Joachim - - | 51 | 3567 | |
| Eliasib - - | 22 | 3589 | |
| Esdras - - | 6 | 3595 | |
| Nehemias - | 5 | 3600 | |
| Joadas - - | 29 | 3629 | Initium Monarchiæ Græcorum sub Alexandro Magno, 3724. |
| Jonathas - - | 20 | 3649 | |
| Jaddus - - | 40 | 3689 | |
| Jaddus - - | 41 | 3730 | |
| Onias 1. - - | 23 | 3753 | |
| Simon 1. - - | 12 | 3765 | |
| Eleazar - - | 32 | 3797 | |
| Manasses - - | 10 | 3807 | |
| Onias 2. - - | 14 | 3821 | |
| Simon 2. - - | 25 | 3846 | |
| Onias 3. - - | 36 | 3882 | |
| <i>Interregnum</i> | 5 | 3887 | |
| <i>Machabæi.</i> | | | |
| Mathathias - | 1 | 3888 | |
| Judas - - - | 6 | 3894 | |
| Jonathas - - | 18 | 3912 | |
| Simon - - - | 7 | 3919 | |
| Joan. Hyrc. | 31 | 3950 | |
| Aristobulus | 1 | 3951 | |

Sexta Mundi ætas. Pontifices Hebræi

| Duces & Pontifices | Anni Regim. | usque ad Ann. | Synchronismus Monarchiarum. |
|--------------------|-------------|---------------|---|
| Alexand. Jan | 24 | 3975 | |
| Hyrchanus 1. | 13 | 3988 | |
| Aristobul. 2. | 3 | 3991 | Initium Monarchiæ Romano- |
| Hyrchan. 2. | 23 | 4014 | rum sub Augusto |
| Antigon. - | 3 | 4017 | 4024. quo |
| <i>Herodian.</i> | | | imperante nat- |
| Herodes Rex | 37 | 4055 | tus est Christus |
| Archelaus - | 6 | | 4053. |
| Agrippa 1. - | 41 | | |
| Agrippa 2. - | 21 | | |
| | | | Excidium urbis Hierosolymæ. |
| | | | Annò post Christum natum. septuagesimò. |



COROLLARIA.

Synopses Librorum ex præmissis Capitibus eruta.

Genes. Exordium omnis creaturæ. Diluvium. Arca Noë. Confusio linguarum. Populi DEI electio, & descensus in Ægyptum.

Exod. 10. Plagæ Pharaonis. Exitus Israëlitarum de Ægypto Decalogus. Judicia & instructio populi. Arca fœderis. Tabernaculum. Arca & vestes Aaron.

Levit. Sacrificia & hostiæ. Urna. Vestes Aaron. Ordo & Ministerium Levitarum.

Num. Numeratio populi seu Tribuum Israël, de Propheta Baalam. Mansiones in eremo.

Deuter. Replicat 4. priores libros, estque compendium Philosophiæ cœlestis, & explicatio Decalogi.

Josue. Transitus Jordanis. Eversio regnorum hostilium. Introductio populi in terram promissam, terræque divisio.

Judic. Populi Israël Principes, Judices, defensio, victoriæ, triumphus.

Ruth. Matrimonium inter Booz & Ruth, ex quibus Christus descendit.

Regum 1. Gubernatio per Judices. Regis Saul electio, regimen, gesta, mors.

2. Regimen Davidis.

3. Mors Davidis, regimen & gesta Salomonis, aliorumque Regum Israël & Juda.

4. Casus regni Juda & Israël, ob Regum peccata. Captivitas populi. Subversio urbis & Templi.

Paralip. 1. Genealogia R David, ejusdémque electionis regiminis, gestorum recapitulatio.

2. Recapitulatur regimen populi per Salomonem & osque Reges Jud: & Israël

Esrae 1. Reductio Israël. ex Babylone. Instructio populi per Eldram L. Doctorem.

Esrae 2. Noëmius Dux agit de readificando muro Jerus. Corriguntur mala suborta eo absente.

Tobia. Hujus probatio & virtutes. Ministerium Archang. Raph. Instructio prolis. Honestas Matrimonii.

Judith. Obsidio Jerusalem & populi Israël. Probitas Judith Interfectio Holofer. & liberatio populi.

Esther. Aman crudelitas & suspendium per prudentiam & humilitatem Esther. Exaltatio Mardochei. Liberatio Judæorum.

Job. Hujus patientia, perfectio, disputatio cum amicis de divina provid. & resurrectione corporis.

Psalmi. Christi Deitas, Humanitas, Passio, Resurrectio, Ascensio, Judicium, Pœna peccatorum. Beneficia & laudes DEI.

Proverb. Instructio incipientium servire Deo, de moribus & virtutibus.

Eccles. Mundi variatio. Vitiorum contemptus. Profectus in via DEI.

Cantic. Viri justii perfectio. Contemplatio animæ sanctæ. Conjunctio Christi & Ecclesiæ.

Sapient. Regimen Prælatorum. Conservatio justii.

justitiæ. Idolorum contemptus. Adventus & Passio Christi, qui vera Sapientia.

Ecdi. Obedientia subditorum. Instructio bonorum morum. Nobilitas Sapientiæ. Laus Sanctorum.

Isaias. Reprehensio Judæorum. Adventus Christi in Carnem. Passio, Vocatio gentium. De regno Judæ & Israël.

Jerem. Captivitas Judæorum. Destructio Jerusalem, indeque lamenta.

Baruch. Verba lecta captivis, prænunciatur rediens populi, & futura temporibus ultimis.

Ezech. Hujus visiones. Scelera Judæorum. Ruina & reparatio Jerusalem.

Daniel. Monarchia Mundi. Mutationes temporum. Potestas & æternitas Christi. Historia Susannæ. Destructio Bel, & Draconis.

Oseas. Idololatria Prædictarum. Inundatio peccatorum. Non tum conversionis.

Josel. Confirmatio terræ Judæorum per erucam, bruchum, locustam, rubiginem. Inductio ad pœnitentiam. Judicium futurum.

Amos. Scelera Judæor. & gentium. Ventura DEI vindicta. Inductio ad Pœnitentiam. Prædictio finis reparationis.

Abdias. Confirmatio & destructio Edon & Esau.
Jonas. Naufragium Jonæ. Ninive (& in ea mundus) ad Pœnitentiam revocatur.

Micheas. Prædictur interitus Samariæ Principum Israël, & Pseudo-Prophtarū pessimerū.

Nabum. Ira DEI gravis contra Ninivitas, qui relinquerunt, sed post gravius deliquerunt.

Habac. Hujus disputatio cum DEO, Justorum in hoc mundo conculcatio, & prosperitas impiorum.

Sophon. Judicium DEI contra Judæos & gentes extraneas. Consolatio populi Israël.

Aggeus. Prædicit reditum Judæorum. Re-ædificatio Templi, & urbis.

Zachar. Liberatio Judæorum. Vindicta contra hostes eorum. Humilitas adventûs Christi, & passio.

Malach. Abjectio populi Judæorum & Sacrificiorum ejus. Christi Adventus.

Machab. 1. Bella in Hebræos & Persas : Liberatio populi sub Mathathia, Jonatha, Simone.

2. Recapitulatio quædam prioris. Tribulatio pop. Constantia 7. fratrum, & Matris eorum. Liberatio pop. per Judam Machab.

Matth. Humanitas Christi præcipuè.

Marc. Fortitudo ejus & Resurrectio.

Luc. Passio & Mors.

Joan. Divinitas.

Acta Apost. Christi Ascensio. Missio Spiritûs Sancti. Gesta Apostolorum, præcipuè Pauli. Infantia Ecclesiæ.

Ad Rom. Revocantur Romani ab erroribus gentium, & cæremoniis legis ad Fidem Catholicam.

Ad Corinth. 1. Corinthiorum schismata componit, & dubia resolvit.

2. Revocat à Pseudo-Prophetis seductos: reductos solatur & laudat.

Ad Gal. A pseudo-Apostolis seductos ut ad legem & circumcis. reverterentur, revocat.

Ad Ephes. Ephesios verbô Veritatis ab Apostolo accepto constantes laudat.

Ad Philipp. Idem argumentum.

Ad Coloss. Hos à pseudo-Prophetis præventos corrigit, adhortans ad fidei veritatem.

Ad Thessal. 1. Laudat eos inter persecutiones civium constantes.

2. Instruit de novissimis temporibus & Antichristo.

Ad Timoth. 1. Instruit de ordinatione Episcopatus, & officio Eccl. disciplinæ.

2. Incitat ad Martyrium, informans de Catholica veritate, & novissimis temporibus.

Ad Titum. Instruit de constitutione Presbyter. conversatione spirituali : hæreticis vitandis.

Ad Philem. Commendat eum à Fide & caritate in Sanctos : rogatq; ut Onesimo servo indulgeat.

Ad Hebr. Ostendit evacuationem L. Mosaicæ, & perfectionem Evangelicæ : & quòd Christus sit verus DEUS & homo, DEI & hominum Mediator.

Jacobi. Suadet patientiam : DEUM non esse acceptorem personarum. Concupiscentiæ mala; bellorum reprehensio, inductis virtutibus.

Petri 1. Grates agit DEO ob Salvatorem Filium.

2. Inducit ad constantiam Fidei, describens secundum Christi adventum.

Joan. 1. Testificatur de verbo Veritatis & Viræ.

2. Electum & filium ejus commendat.

3. Cajum extollit, monens, ut in pietate permaneat.

Jude. Omnes monet salutis propriæ: inducit altercationem Michaëlis cum satana: detestatur hæreticos.

Apocal. Revelationes factæ Joanni per Angelum in Insula Pathmos. Ecclesiæ tunc, & in futurum tribulationes. Antichristus. Supplicia damnatorum. Præmia electorum.

Quadruplex Scripturæ sensus.


Literalis, gesta docet: quid credas, allēgoria:

Moralis, quid agas: quòd tendas, anagogia.

In literali excellens habetur S. Hieronymus: in allegorico Ambrosius: in morali Gregorius: in anagogico Augustinus, quor Ecclésiæ Doctores.



Biblioteka Jagiellońska



stdr0022056

